


左傳補註

四之六

坤



			四	漢	門
			九	書	門
			〇		
			三		
			八		
			二		
二	九	八	二		
冊	架	函	號	類	

			四	漢	
			九	書	
			〇		
			二		
			二		
二	四	二	二		
冊	架	冊	號	類	

內閣文庫		
番號	漢	4902
冊數	2 (2)	
函號	274	190




A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



Kodak, 2007 TM: Kodak





春秋左傳補註卷第四

廿二年傳焉用聖人 風俗通曰聖者聲也言聞聲知

情故曰聖家語顏回曰武仲世稱聖人何休膏音曰

說左氏傳者春秋之志非聖人孰能脩之言夫子聖

人乃能脩之御叔謂臧武仲為聖人是非獨孔子玄

箴之曰武仲者述聖人之道魯人稱之曰聖今使如

晉過御叔御叔不說學見武仲而雨行教之云焉用


聖人為左氏傳載之者非御叔不說學不謂武仲聖

與孔子同

與執燔焉釋文云燔又作膳 案僖廿四年傳及成十

三年傳皆作膳說文曰繇宗廟火孰肉从炙番聲春

淺草文庫



秋傳曰天子有事饗焉以饋同姓諸侯此傳燔字當
从燔轉寫誤為燔耳

執事實重圖之 高誘曰重深

貴而能貧 能猶耐也

未益祿而有馬數十乘 荀卿子曰大功已立士大夫

益爵官人益秩庶人益祿未益祿而有馬士庶同于

卿

三日棄疾請尸 周禮掌戮曰凡殺人者肆之三日

廿三年傳禮為鄰國闕 服虔曰鄰國尚為之闕樂况

甥舅之國乎顧氏補正用其說而不稱服註

右撫劍 案古制舞劍于左軍禮從右

斐豹 廣韻引作斐甫微切

戊邾邵 棟案邾邵晉二邑文六年傳云趙孟殺公子

樂于邾說文曰邾晉邑司馬彪郡國志曰河東垣縣

有邵亭張華博物志曰垣縣東九里有邾邵之阨

晏釐 徐邈音來棟案外傳作萊古字通徐音是也

新樽絜之 釋文云本亦作尊又昭十五年傳樽以魯

壺釋文云樽本或作尊又作樽棟案曹憲文字指歸

云檢字無此从缶从木者說文云字从囟寸酒官法

度也今之尊卑從此得名故尊亦為君父之稱

禍福無門唯人所召 無門言同一門出入也荀卿子

曰禍與福鄰莫知其門管子禁藏篇曰福不擇家禍

不索人

大補註四

美疾不如惡石 服虔曰砭石也戰國策曰扁鵲怒而

投其石高誘曰石砭所以砭彈人癰腫也石見山海經

娶于鑄注鑄國 樂記曰武王未及下車封帝堯之後

于祝康成云祝或為鑄高誘曰鑄讀作祝古音通故

或作鑄或作祝

盍以其犯門斬關 周禮司盟曰盟萬民之犯命者故

孟椒欲用之當其罪

季孫用之 疾疾之言驗矣

下妾不得與郊弔 子惠子曰賤者野受弔謂之郊弔

所謂君遇柩於路使人弔者庶人則然士喪君視斂

則郊弔非士也注與正義皆失之

不穴於寢廟 子惠子曰廟日祭月祀朝聘饗燕皆行

之於廟故鼠不穴疏以為廟幽靜失之

廿四年傳既歿其言立 高誘呂覽注曰立猶見也

恕思以明德 周書程典曰慎德必躬恕恕以明德李

登聲類曰恕人心度物也

輔躒 說文引作趨釋文曰本又作櫟

部婁無松栢 說文引作附婁云小土山也應劭風俗

通曰部者阜之類也今齊魯之間田中少高邛名之

為部矣周伯琦六書正誤畝从自仅聲俗用培塿非

皆居轉而鼓琴 傳遜曰轉當為軫棟案文選注引許

三補注四

慎淮南子注曰軫轉也或是古軫字有作轉耳方言曰軫謂之枕郭璞曰車後橫木

敢問降階何出君禮臣有降階之儀程鄭下人非所空問故云惑也

廿五年經諸侯同盟于重邱應劭地理風俗記曰安

德縣北五十里有重邱鄉故縣也

傳困于石往不濟也據于蒺藜所恃傷也往不濟謂

九四為石所恃傷謂九二為蒺藜初至四互未濟故

往不濟

公拊楹而歌服虔曰公為姜氏不知已在外故歌以

命之也一曰公自知見欺恐不得出故歌以自悔

陪臣于楸史記作爭趣棟案左傳楸字亦有作趣者

昭廿年傳云賓將楸杜子春注周禮引此作趣史記

本作干趣徐廣後人改為爭趣非也楸二字古皆从取聲

故君為社稷死則死之為社稷亡則亡之服虔曰謂

以公義為社稷死亡也如呈者臣亦隨之死亡案杜

義未完

若為己死而為己亡非其私暱誰敢任之服虔曰言

君自以己之私欲取死亡之禍則私近之臣所當任

也

南史氏新序云南史氏是其族也

執簡以往服虔曰古文篆書一簡八字案齊崔杼弑

其君光則一簡之文也

四翼 高誘呂覽注曰翼棺飾也畫黼黻之狀如扇於
俚邊天子八諸侯六大夫四也又淮南子注曰翼狀
如今要扇畫文插置棺車箱以為飾多少之差各從
其爵命之數也翼本作翌古文也周禮縫人云本翼
柳之材注云故書翼柳作接攢鄭司農云接讀為翌
攢讀為柳皆棺飾檀弓曰周人牆置翼春秋傳曰四
翌不蹕先鄭引檀弓作翌引左傳作翌明古文春秋
傳本作翌杜氏改為翼失之矣

當陳隧者 高誘曰隧道也司空治軍隧道王肅以為
墓道非也

昔虞闕父 陳球碑作遏高誘曰闕讀曰遏止之遏然
則闕遏同音故或作遏也

為周陶正 王應麟曰有虞氏上陶舜陶河濱器不苦
窳周陶正猶以虞闕父為之

以備三恪 說文引作窳从心客聲敬也義雲章亦以
窳為恪魏封孔羨碑又作恪焦弱侯以為恪即古客
字未詳禮記正義熊氏云周之三恪越少昊高辛遠
氏沒黃帝
堯舜氏作

授手于我 手古首字士喪禮云載魚左首進鬢注云
古文首為手成二年經曹公子首公羊作手是字通
之證

天子之地一圻 鄭康成引作畿高誘曰方千里為畿
方百里為同周禮大司馬九近之籍先鄭司農云近
當言畿盖古圻字或作近禮記相近于坎檀王肅讀
近為祈齊侯罇鐘云用岸眉壽岸本古文近字通為
祈詩有祈父尚書酒誥作圻父鄭康成詩箋云祈圻
畿同

書曰慎始而敬終終以不困注逸書 案周書常訓解
云慎微以始而敬終乃不困正義以蔡仲之命云云
證之此晉時偽古文襲左傳而為之者也徐幹中論
引書云慎
始而敬終
以不困

廿六年傳領之而已 說文引作領云低頭也玉篇引

杜氏注亦作領又音欽曲頤也列子云巧夫領其頤
而歌合律注云領猶搖頭也

子產其將知政矣 呂覽仲冬紀曰申侯伯如鄭三年
而知鄭國之政高誘曰知猶為也

乃立囚 子惠子曰立囚為證也

赤而毛 服虔曰其身色赤而生毛也

平公入夕 服虔曰視夕也

而視之尤 服虔曰尤過也意悅之視之過也

姬納諸御 服虔曰納之平公之御

嬖生佐惡而婉太子瘞美而狠 服虔曰婉順也佐貌
惡心順太子貌美而心狠狠戾不從教案後傳云元

公無信多私不得如服注惡而婉謂內惡而外婉也
美而狠謂內美而外狠也以伊戾之讒慝小人而不
為太子所寵而元公獨嬖寺人柳則二人之賢不肖
顯然矣

寺人惠牆伊戾 服虔曰寺人宋閹士惠牆皆發聲寔
為伊戾以公寺人為太子內師掌內官

過宋 服虔曰楚客道過宋

夫不惡女乎 服虔曰夫謂太子伊戾無寵於太子故
曰夫不惡女

縱有共其外莫共其內 服虔曰言我內師也當共內
使

加書徵之 服虔曰以書為之徵驗也書盟書

欲速 服虔曰速疾也欲疾代公得位故與楚客謀弒
其父也

固聞之 服虔曰固久也久聞太子欲為亂

唯佐也能免我 佐內惡而外婉太子不知而謂其能
免我實不然也

左師聞之 服虔曰聞太子與佐期中

乃縊而死 服虔曰經書宋公殺其世子痤平公用伊
戾之譖信夫人左師之言世子無罪而死故稱宋公
殺罪之也

左師見夫人之步馬者 廣韻曰駮馬習馬孫恂案左

傳步馬字不从馬

君夫人氏也 正義曰夫人氏者氏猶家也棟案正義非也弃木芮司徒女與宋同姓故不云某氏始言君夫人氏後言君之妾弃也公羊傳曰宋三世無大夫三世內娶也

君與夫人不善是也 唐石經云君與大夫下云君大夫謂椒舉石經是也案林堯叟本仍作夫人知傳譌已久韋昭曰是理也

楚之良在其中軍王族而已 唐固國語注云族親族同姓也韋昭曰族謂部屬棟案韋說是也成十六年傳云欒范以其族夾公行劉光伯曰族者屬也非謂

公族之兵

欒范易行以誘之 鄭衆曰易行中軍與上下軍易卒伍也中軍之卒良故易之賈逵又一說見正義皆勝

杜注

廿七年傳皆取其邑而歸諸侯諸侯是以睦於晉 劉光伯云晉宋古本皆不重言諸侯則唯謂齊魯宋三國睦耳棟案不重言諸侯是也謂唯三國睦非也上文云使諸侯偽效烏餘之封者是時三國皆在故下云皆取其邑而歸為絕句重言諸侯者衍文也

唯卿備百邑注此一棄之邑正義曰一棄之邑每邑方十里 棟案熊安生禮記義疏云卿備百邑者鄭志

以為邑方二里與百乘別

欲弭諸侯之兵 弭亦作彌周禮小祝彌裁兵杜子春

讀弭如彌兵之彌康成云彌讀如救救安也

仲尼使舉是禮也以為多文辭 服虔曰以其多文辭

故特舉而用之後世謂之孔氏聘辭以孔氏有其辭

故傳不復載也此與公羊昭廿五年齊侯唁公于野

并以遇禮相見孔子曰其禮與其辭足觀矣皆仲尼

之所取者也

楚氛甚惡 王逸楚辭章句曰氛惡氣也

晉楚爭先 子惠子曰楚人衷甲為爭先也

以誣道蔽諸侯 陸氏曰服虔王肅董過竝作弊婢世

反云踣也正義曰服本作弊云斃踣也一曰罷也棟

案蔽與弊通昭十四年傳云叔魚蔽罪邢侯周禮大

司寇職云以邦成弊之鄭衆曰蔽之斷其獄訟也是

蔽與弊通

何以恤我我其收之 顧炎武云見周頌棟案頌云假

以溢我說文及廣韻引詩云誠以謚我誠與何音相

近伏生尚書云維刑之謚哉古文作恤恤慎也故毛

傳亦訓溢為慎釋文今傳作恤與毛傳義合古謚溢

字通莊子齊物曰以言其老洳也釋文云洳本亦作

也溢古書篆作立心與水相近故恤誤為洳又為

也鄭氏訓為盈溢失之杜氏訓恤為憂尤誤說文云

齊崔杼生成及彊而寡 墨子辭過篇曰內無拘女外
無寡夫又云天下之男多寡無妻女多拘無夫顧炎
武案小尔疋云凡無夫無妻通謂之寡

棠無咎 唐石經無作无棟案无字見衛宏古文奇字
今易无咎字皆从此釋文云本亦作无

崔宗邑也 案宰相世系表崔氏之先齊丁公之嫡子
季子讓國叔乙食采於崔遂為崔氏故曰宗邑猶晉
之曲沃也

崔明來奔 宰相世系表曰子明奔魯生良十五世孫
意如為秦大夫封東萊侯

廿八年傳歲在星紀而淫于亥枵注星紀在丑斗牛之

次亥枵在子虛危之次 漢律歷志星紀在子亥枵

在丑正以歲星右行于天星紀為子而貞于丑故在

丑其次亥枵貞于丑則在子如是則十二辰皆合

樂用焉漢法陽左行陰右行者每退一辰以次

為貞故星紀貞于丑時俗以星紀為丑亥枵為子失

之 合辰合樂本坤
彖喪朋之說

子雅子尾注二子皆惠公孫 棟案高誘呂覽注云子

雅惠公之孫公子欒堅之子竈也子尾惠公之孫公

子高祈之子薑也杜氏高氏皆據世本唐時世本已

非全書故正義不詳所出 韓非子曰子夏子尾者景
公之二弟也夏與雅古字

通

得慶氏之木百車于莊注六軌之道 下云反陳于嶽
注云嶽里名案莊亦里名昭十年傳云又敗諸莊哀
六年戰于莊孟子曰莊嶽之間趙岐曰莊嶽齊街里
名

樂高陳鮑之徒注樂子雅高子尾 案樂堅高祈以字
為氏故曰樂高

慶封祀祭 鄭康成讀祀與窆同補鄧反

吳句餘注句餘吳子夷末也 司馬貞曰計餘祭襄十

九年卒則二十八年賜慶封邑不得是夷末棟案服
虔以句餘為餘祭是也

朱方 顧夷吳地記曰朱方秦改曰丹徒

在外不得宰吾一邑 得罪出外則不得宰一邑
故下云恐失富也正義以宰為益失之

夫民生厚而用利於是乎正德以幅之使無黜嫚 子

惠子曰此夏書九歌中三事之義疏也

武王有亂臣十人 唐石經無臣字石經論語亦然又

昭廿四年傳引大誓亦無臣字後人皆據晉時所出
古文大誓以益之非也辨見論語考

榮成伯 王符曰榮氏魯公族韋昭曰成伯魯大夫聲

伯之子名樂

以徵過也 子惠子曰徵讀從楚辭不清徵其然否之

徵

廿九年傳璽書追而予之 高誘曰璽讀如移徙之徒
印也韋昭曰古者大夫之印亦稱璽璽書璽封書也
應劭漢官儀曰封太山以金泥銀澠印之以璽璽施
也信也古者尊卑共之月令曰固封璽春秋傳璽書
追而與之是也秦漢以來尊者以為名乃使避衛宏
漢舊儀曰秦已前民皆以金銀銅犀象為方寸璽各
服所好漢以來天子獨稱璽又以玉羣臣莫敢用也
棟案璽惟周禮月令及此傳有明文餘無聞焉唐六
典引周書曰湯放桀大會諸侯取天子之璽置天子
之座云云據此則商以前已有璽名矣
祇見疏也 棟謂疏當為詭字之誤也呂覽先識篇云

無由接而言見詭高誘曰詭讀為誣妄之誣下云欺
其君何必使余明疏為誣欲之而言叛非誣乎杜氏
好改古文故古文古義存者少矣

固辭 鄭康成曰固之言如故也言如故辭者重辭也

投壺 唐石經云辭固疑非

不尚取之 服虔曰不尚尚也尚當取女叔侯殺之
武獻以下兼國多矣 呂覽曰獻公即位五年兼國十

九

毋寧夫人而用老臣 服虔曰毋寧寧也寧自取夫人

將焉用老臣乎劉炫是服說

請觀于周樂 服虔曰周樂魯所受四代之樂

猶未也 賈逵曰言未有推頌之成功也服同

吾聞衛康叔武公之德如是 賈逵曰康叔遭管叔蔡

叔之難武公懼幽王褒姒之憂故曰康叔武公之德

如是

為之歌王 服虔曰王室當在雅衰微而列在風故國

人猶尊之故稱王猶春秋之王人子惠子曰王者采

風畿內故有王風周官六詩比賦興風雅頌安得謂

王者無風後儒以詩為雅失之甚矣

其細已甚民弗堪也 服虔曰其風細弱已甚攝乎大

國之間以遠慮持久之風故曰民不堪將先也

泱泱乎大風也哉 服虔曰泱泱鈞緩深遠有大和之

意其詩風刺辭約而義微體疎而不切故曰大風

國未可量也 服虔曰國之興衰世數長短未可量也

此之謂夏聲 服虔曰與諸夏同風故曰夏聲揀案後

世言秦夏本此

大而婉險而易行 賈逵曰其志大直而有曲體歸中

和之德難成而易行案史記險作儉古文也漢劉脩

碑云動乎儉中今易作險

則明主也 史記作盟主案古盟字从囧賈侍中說讀

與明同嘯堂集古錄載齊侯罇鐘曰繼命于外內之

事中敦盟荆盟荆即明刑也毛詩黃鳥曰此邦之人

不可與明箋云明當為盟釋名盟明也告其事於神

明也

怨而不言 王肅曰非不能言畏罪咎也

其周德之衰乎 服虔曰此歎變小雅也自鹿鳴至菁

菁者莪道文武脩小政定大亂致大平樂且有儀是

為正小雅陳文王之德武王之功自文王以下至息

鷺是為正大雅

遷而不淫 服虔曰遷徙也文王徙鄴武王居鄩

若有他樂吾不敢請已 服虔曰周用六代之樂堯曰

咸池黃帝曰雲門魯受四代下周二等故不舞其二

季札知之故曰有他樂吾不敢請

子速納邑與政 服虔曰入邑與政職於公不與國家

之事子惠子曰古者有政便有邑邑者田邑也古祿
以田

慎之以禮 服虔曰禮所以經國利社稷也

辨而不德必加於戮 服虔曰辨若鬪辨也夫以辨爭

不以德居之必加於刑戮也

吾子好直 服虔曰直不能曲撓以從衆

裨諶 古今人表作卑湛師古曰卑音脾湛音諶風俗

通曰卑氏鄭大夫卑湛之後漢有卑躬為北地太守

杜改卑為裨俗又改湛為諶古文畫亾矣釋文猶作

湛

卅年傳正月甲子朔四百有四十五甲子矣其季於今

三之一也 熊朋來曰魯襄公三十年歲次戊午二月辛酉朔初四日甲子二十三日癸未日其季於今三之一者言甲子數至癸未日正得二十日是分六十甲子之一也季者餘數也積四百四十四甲子零二十日算得二萬六千六百六十日除五十三日在本年正二月戊午正月大該三十日二月二十三日止有二萬六千六百零七日逆推得絳縣老人是魯文公十一年乙丑歲三月生故曰臣生之歲正月甲子朔注謂夏正月若以周正則三月也本合云七十四年此時方是二月若夏正則十二月故除本年不算曰七十三年也

亥有二首六身 子惠子曰史趙以亥字推算其年者

盖以亥乃絳縣人之名即孟子之亥唐韓非子言晉

平公於唐亥云云或孟子傳寫倒其名氏也

或叫于宋大廟曰禧禧出出 叫說文引作訃云大呼

也唐石經作叫傳遜曰說文云禧痛也案說文引傳

云誤誤出出云誤然从言矣聲說文訓禧為痛與此

傳無涉傳氏非也鄭氏周禮注引作禧禧出出

公焉在 士喪禮曰升公卿大夫繼主人東上鄭注云

公大國之孤四命也賈疏典命云公之孤四命鄭為

伯爵不命言孤但良宵鄭之公族大夫貴重之極比

于大國之孤故家臣尊其主亦號為公耳

印段 說文作碣字子石

介于襄庫 案介甲也取襄庫之甲以入伐襄廿六年

齊烏餘襲高魚介其庫注云入高魚之庫而介其甲

是也襄廿七年傳云介慶氏之甲

上下有服 高誘曰服法服也君子小人各有制

斗城 案水經注斗城在陳留沙水所經也

吾其與之 高誘曰與猶助也

卅一年傳古之道也 何休膏旨曰若其以下隱桓以

禍皆由此作乃曰古制固亦謬矣鄭箴之曰立長以

嫡不以賢固立長矣立子以貴不以長固以貴矣若

長均貴均何以別之故須卜禮有詢立君卜立君是

有卜也

是謂不度 顏籀曰不度不遵禮度也棟案孝經援神

契云天子之孝曰就諸侯曰度在戚而有嘉容故謂

之不度

猶有童心 服虔曰言其無成人之志案士冠禮曰弃

尔幼志順尔成德幼志猶童心也諸侯十二而冠昭

公十九年矣猶有童心故不終荀子曰天子諸侯十

有童心故不終也

高其闕注闕門也 匡謬正俗曰下文云門不容車

杜元凱云門庭之內迫迮又有墻垣之限尔疋云所

以止扉謂之闕郭景純云門辟旁長板也左傳曰高

其閤闕案若館門實高而直庭內迫迫者即當云庭不容車不應云門也又高為門戶非關止盜之方文伯所稱不應云以無憂容使若門得車入則子產止須引車入門何勞壞垣云不可踰越蓋是門既不大而止扉又高以牢固扞禦寇賊子產為其不容車入故壞垣耳尋文究理郭說得之

繕完葺牆李涪刊誤曰案文當云繕宇葺牆書云峻宇彫牆足以為此

圻人以時埋館宮室劉逵引此傳埋作冢云墁也館宮室諸侯傳也

矢厲不戒正誤曰矢厲注疏及臨川本作天地之天

興國本及建本作矢闕之天據注當作天然經中有言厲疾矢扎則矢厲亦不為非姑示達者

子太叔美秀而文案說苑政理篇亦載此事蓋本左傳乃云子太叔善決而文善決訛為美秀

公孫揮能知四國之為而辨於其大夫之族姓班位說苑政理篇作族姓變立愚案變立即古文班位字也古讀變為辨辨為班古文位作立劉歆傳曰春秋傳多古字古言乃知向所據者皆古字也

故委政焉倉頡篇曰委任之也

令尹似君矣正義曰服虔云言令尹動作以君儀故云以君矣服言以君儀者明年傳云二執戈者前矣

是用君儀也俗本作似君若云似君不須言矣今定
本亦作似君恐非棟案古以字作呂與似通故誤作
似此條正義見宋槧本故備錄之

衛詩曰十九年傳歌邶鄘衛季札曰是其衛風乎知
邶鄘衛皆為衛詩詩序亦云

紂囚文王七年諸侯皆從之囚 汲郡古文曰帝辛廿

三年囚西伯于羑里廿九年釋西伯諸侯逆西伯歸

于周周書程典商王用宗讒震怒無彊諸侯口娛逆

諸文王

昭元年傳伍舉為介 孫叔敖碑作五舉案唐石經初

刻亦作五後改从人非也伍尚伍員字同古今人表

不從人

梁其蹙 孫恂曰梁其蹙魯伯禽子梁其之後

牆之隙壞 韓非子曰牆之壞也必通隙

周有徐奄 案周書周公相天子殷東徐奄从三叔為

亂又汲郡古文云成王二年奄人徐人及淮夷入于

邶以叛賈景伯杜元凱皆云徐卽淮夷失之

趙孟欲一獻 鄭玄曰一獻士飲酒之禮

具五獻之籩豆於幕下注朝聘之制大國之卿五獻

禮記正義曰卿大夫俱三獻故昭六年傳云得貺不

過三獻五獻者亂世之法非禮之正也

大國省籩而用之 周書程典曰生籩省用不濫其度

弁冕端委注弁冕冠也 案釋文云弁端委無冕字石
經及正義皆云弁冕端委說文云冕古弁冕也故杜
訓為冕冠弁冕之冕衍文也

子盍亦遠績禹功而大庇民乎 周譜云定王五年河
徙故道及穀維鬪後河勢愈甚劉子以治河事委趙
孟故有是言齊人城邾晉未聞焉鄭大叔曰晉國不
恤宗周之闕是也

諺所謂老將知而耄及之者 大雅抑詩曰借曰未知
亦聿既耄蓋當時之語云亦然

徐吾犯 廣韻曰鄭公子有食采於徐吾之鄉後以為
氏據此則子南子哲爭同姓以為室也

及衝擊之以戈 說文引云及衝以戈擊之

將行子南 鄭康成詩箋云行亦放也下文子將

周公殺管叔而蔡蔡叔注蔡放也 釋文云上蔡字音

素葛反說文作縶从殺下米玉篇云縶糝縶散也書

作蔡字正義漢書宣帝元康三年詔曰骨肉之親祭

而不殊猶康琴賦云新衣翠縶李善云子虛賦翕呬

翠縶張揖曰翠縶衣聲也案子虛賦又作萃蔡愚謂

漢書文選縶字皆縶字之誤縶本與蔡通故又作蔡

禹貢曰二百里蔡鄭康成注云蔡之言殺鄭注尚書

衰也衰猶殺也減殺其賦減殺者猶未減也叔非首謀慮从

未減之科故不殺而囚之如此則不必改字而義亦

得矣

上文云余不女忍殺宥女以遠亦謂从未減

小介足曰蔡法也

造自于河 徐堅曰在蒲反夏陽津今蒲津浮橋是其處

鮮不五稔 王充曰王者有過異見於國不改災見草

木不改災見於五穀不改災至身若年穀和孰不至

及身而亡故云鮮不五稔

兩於前伍於後專為右角參為左角偏為前拒 服虔

引司馬法曰五十乘為兩百二十乘為伍八十一乘

為專二十九乘為參二十五乘為偏阮逸謂荀吳用

車法雖舍車而法在其中服氏之說未可非也

實沈臺駘為崇 說文曰崇神禍也

曠林 賈逵曰曠大也

遷閔伯於商邱 賈逵曰商邱在漳南

主辰 服虔曰主祀也

及成王滅唐而封太叔焉 史記封作國鄭世家棟案尚

書序云武王既勝殷邦諸侯又康誥序云以殷餘民

邦康叔孔氏云國康叔為衛侯此傳依史記當云邦

大叔古字邦封同見書正義漢諱邦改為國故云國大叔

也論語邦域之中今作下文封諸汾川同

宣汾洮 正義曰洮水闕子惠子曰洮即涑川酈氏以

為涑水一名洮水水出河東聞喜縣黍葭谷俗謂之

華谷至周陽與洮水合司馬彪曰洮水出聞喜縣故

左補注曰

王莽以縣為兆亭

山川之神則水旱癘疫之災於是乎禳之日月星辰之神則雪霜風雨之不時於是乎禳之 鄭康成注周禮引此傳云日月星辰之神則雪霜風雨之不時於是乎禳之山川之神則水旱癘疫之災於是乎禳之 賈公彥曰鄭君所讀春秋先日月與賈服不同說文曰禳者設絲莖為營以禳風雨雪霜水旱癘疫於日月星辰山川也是許君所讀春秋亦與鄭同史記所載同於 賈服

中聲以降 荀卿子曰詩者中聲之所止也揚倅曰詩謂樂章所以節聲音至乎中而止不使流淫也

風淫末疾 賈逵以末疾為首疾謂風眩也逸周書曰元首曰末易卦初為本上為末故上為首為角杜據素問以四支為四末故謂末疾為四支然不及賈注之當

穀之飛亦為蠱 釋器云康謂之蠱郭璞曰米皮簸之揚之康糝在前故云穀之飛外傳云蠱之慝穀之飛實生之

將會孟子餘 史記趙世家云趙夙生共共生孟孟生衰古今人表云趙孟夙子生衰世本云公明生共孟及夙案文當云共孟及衰史記分共孟為兩人傳寫之誤孟子餘謂共孟及衰

甲辰朔烝于溫 服虔曰甲辰朔夏十一月朔也祭人
君用孟月人臣用仲月
二年經叔弓注叔老子 世本曰叔肸生聲伯嬰齊齊
生叔老老生叔弓

傳見易象與魯春秋曰周禮盡在魯矣吾乃今知周公
之德與周之所以王也 古謂易為象故曰易象九
家說卦云乾為衣坤為裳繫曰黃帝堯舜垂衣裳而
天下治蓋取諸乾坤尚書皋陶謨帝曰予欲觀古人
之象古人之象即易也法乾坤而制衣裳觀象方知
故欲觀古人之象古人當謂黃帝伏羲畫八卦神農
重之黃帝通之杜子春以歸藏為黃帝易有以也在

天成象伏羲法之作八卦故謂之象商謂之坤乾周
謂之易左氏稱易象猶不失古意觀書于太史氏上
自易象下至魯春秋中舉周禮而周禮一書于宣子
口中敘出此左氏行文之妙也周禮為周公致治之
書觀周禮故知周公之德易為聖人贊化育之書故
觀易象而知周之所以王謂文王也讀者不考周禮
一語遂謂易象爻辭乃周公所作以實周公之德一
語失之遠矣

季氏有嘉樹焉宣子譽之注譽其好也 服虔曰譽游
也宣子游其下夏諺曰一游一譽為諸侯度今孟子
作豫趙岐章句曰豫亦遊也春秋傳曰季氏有嘉樹

宣子豫焉周易序卦曰豫必有隨鄭康成注引孟子
吾君不豫以為證則知此傳譽字本作豫故服趙互
引為證孫子兵法曰人效死而上能用之雖優游暇
譽令猶行也外傳作暇豫李善曰譽與豫古字通

三年經北燕伯欵出奔齊 此與衛侯行出奔齊一例

杜注謬

傳張趯 宰相世系表曰周宣王時有卿士張仲其後

裔事晉為大夫張侯生老老生趯趯生駘

豆區釜鐘 顧氏補正云毛晃曰豆當為斗後人誤作

俎豆之豆用之考工記一獻而三酬則一豆矣豆古

斗字棟案考工梓人云爵一升觚三升獻以爵而酬

以觚一獻而酬則一豆矣一獻三酬則十升不得為
四升之豆故鄭注云豆當為斗陶人云庾實二鬴先
鄭云鬴讀為斛鬴受三斗聘禮記有斛案聘禮記云
十斗曰斛安得云鬴受三斗故鄭據旒人云豆實三
而成鬴則鬴受斗二升明鬴不得為斛豆不得為斗
矣

三老凍餒注三老謂上壽中壽下壽皆八十已上不見

養遇 服虔云三老者工老商老農老棟案杜說是

也晉姜鼎銘云保其子孫三壽是利魯頌曰三壽作

朋三代養老之法于國老中取三人焉謂之三老于

庶老中取五人焉謂之五更

道瑾相望 荀悅曰道瘞謂之瑾亦作瑾韋昭依毛傳曰道家為瑾

女富溢尤 周書鄭保十敗所謂女貨速禍也

君日不悛以樂怡憂注怡藏也 棟案怡過也言君不

思悛改可憂而樂與日俱怡 訓怡為過見毛詩傳 劉光伯云怡

慢也好音樂而慢易憂禍義亦通

讒鼎之銘 韓非子說林曰齊伐魯索讒鼎魯以其鴈

往齊人曰鴈也魯人曰真也是古鼎之名 已見困蓋學紀開

當時鼎已在齊故晏子述之

公事有公利無私忌 韓非子曰私怨不入公門一說

忌忌日故云私忌

小人糞除先人之敝廬 聘禮卿館于大夫游吉卿也

張趯大夫也吉送少姜葬館焉故今云糞除先人敝

廬舍廟中故云先人

左傳補註卷第四終

順德胡亦常覆按

春秋左傳補註卷第五

昭四年傳冀之北土馬之所生 盧毓冀州論曰冀州

北接燕代初學記後世謂代為馬郡故呂覽曰馬郡宜

馬

以亨神人注亨通也 亨古文享字杜訓為通故古文

獨存新序載此事作享

冬無愆陽 周書時訓曰草木不黃落是為愆陽

秋無苦雨 服虔曰害物之雨民所苦

夏啟有鈞臺之享 汲郡古文曰夏啟元年帝即位于

夏邑大饗諸侯于鈞臺歸藏啟筮曰昔夏后啟筮亨

神於大陵而上鈞臺技古泉陶曰不吉連山易曰啟

筮亨神於大陵之上酈元曰卽鈞臺也魏大饗碑云
夏啟均臺之亨均古鈞字亨古享字

商湯有景亳之命 汲郡古文云帝癸二十八年昆吾

氏伐商商會諸侯于景亳遂征韋商師取韋遂征顧
成有岐陽之蒐 汲郡古文曰成王六年大蒐於岐陽

晉語云昔成王盟諸侯于岐陽楚為荆蠻置茅蕝設
望表與鮮牟守燎故不與盟

康有艷宮之朝 汲郡古文曰康王元年朝于豐宮服

虔曰艷宮成王廟所在也

穆有塗山之會 汲郡古文曰穆王三十九年會諸侯
于塗山

寡君將墮幣焉 服虔曰墮輸也子惠子曰墮幣謂祭

也周禮肆師大祀用玉帛又守祧藏墮大祝墮釁小

祝蕡墮特牲少牢又有墮祭然則禮神之幣亦曰墮

謂祭後乃相見故曰敢謝後見如服杜解則與上文

宗祧之事不相連屬而文亦不順蓋楚之武城有先

君之廟也服云將受宋之幣於宗廟謂薦陳之亦可

備一說

夏桀為仍之會有緡叛之 汲郡古文曰帝癸十一年

會諸侯于仍有緡氏逃歸遂滅有緡

商紂為黎之蒐東夷叛之 汲郡古文曰帝辛四年大

蒐于黎韓非子曰紂為黎邱之蒐而戎狄叛之服虔

曰黎子姓

周幽為大室之盟戎狄叛之 汲郡古文曰幽王十年
春王及諸侯盟于大室明年申人繒人及犬戎入宗
周弑王

無或如齊慶封弑其君弱其孤以盟其大夫 呂氏春
秋載此事曰母或如齊慶封弑其君弱其孤以亾其
大夫弱其孤謂殺崔成崔彊亾其大夫謂崔杼強而
此哀六年傳云不必亾一大夫左氏傳世既久或先
秦以來所據本異當以呂覽為正
鄭子產作邱賦 服虔曰作邱賦者賦此一邱之田出
一馬三牛復古法耳邱賦之法不行久矣今子產復

脩古法民以為貪故謗之子惠子曰春秋作邱賦當
从服說作邱甲當从穀梁說 下引詩禮義不愆何恤
於人言若依杜注加賦
病民何不愆之
有服注是也

詩曰禮義不愆何恤於人言 荀卿子載是詩云長夜
漫兮永思騫兮大古之不慢兮禮義之不愆兮何恤
人之言兮愆當作讐从籀文見余足疏

作法于涼注涼薄也 說文曰余足羸薄也从无京聲
廣雅曰羸禱也曹憲曰良音世人作羸禱之羸水旁
著京失之矣禱即薄字郭忠恕汗簡云古尔足涼作
羸

姬在列者注在列國 案列位也言姬姓之君僖十五

年傳云入而未定列

入棘櫟麻 酈元曰汝水東逕櫟亭北春秋之棘櫟也

今城在新蔡故城西北半淪水杜預以為在東北未

詳司馬貞曰解者以麻即襄城縣故麻城是也

曰唯 皇侃禮記義疏曰唯謂人應爾是也

饗大夫以落之 服虔曰饗以豕豕為落

牛謂叔孫見仲而何 正義曰牛謂叔孫曰以仲見君

何問何故以仲見君其說非是案韓非子載此事云

豎牛謂叔孫何不見壬於君乎叔孫曰孺子何足見

也豎牛曰壬固已數見於君矣君賜之玉環已佩之

矣玩傳義與韓非合

夫子疾病不欲見人 秦越人難經五十一難曰病有

欲見人者有不欲見人者欲見人者病在府也不欲

見人者病在藏也府者陽也陽病者欲得寒之又欲

見人藏者陰也陰病欲得温又欲閉戶獨處惡聞人

聲

牛弗進則置虛命微 張衡集舊注引傳云牛不進叔

孫覆器空而選之示君已食盖增益傳文而為之或

本左氏舊說意亦與杜注同也

五年傳毀中軍於施氏成諸臧氏 棟案臧氏為司寇

古者兵獄同制故質成于臧氏

葬鮮者自西門 列子曰越東有輒木之國其長子生

則鮮而食之張湛注引此為證云鮮謂鮮少也

卿喪自朝注從生存朝觀之正路服虔云言卿葬三

辭於朝從朝出正門卿佐國之損幹君之股肱必過

於朝重之也案杜臆說當从服氏

既葬而行注善杜洩能辟禍唐宰相世系曰杜洩避

季子之難奔於楚生大夫綽綽生段段生赫赫為秦

大將軍食采於南陽衍世稱為杜衍

使亂大從注使從於亂服虔曰使亂大和順之道案

從順也服注是

故有十時亦當十位古言時皆謂四時此十時謂分

一日為十時以當王至臺之十位杜注用十二時與

傳不合十時據日十
二時據辰

明而未融服虔曰融高也謂日高也

純離為牛荀九家序卦曰離為牡牛

菟氏酈元曰野兔水上承兔氏亭北野兔陂鄭地也

陂水東北入八里溝溝水南逕右倉城西又南逕兔

氏亭東鄭伯勞屈生於兔氏即此

子家羈注羈莊公玄孫懿伯也司馬貞曰子家駒魯

大夫仲孫氏之族字懿伯揚倬曰子家羈公子慶之

孫歸父之後名羈字駒案仲孫氏出自桓且懿伯為

子家謚非字也司馬失之世本云述產子家歸父述

遂古揚氏謂羈為歸父之後則是桓公玄孫非莊公

也世本已也無可是正

索氏 索音柵故水經或作柵

朝聘有珪 案說文珪古文圭

芊舌四族注四族銅鞮伯華叔魚叔虎兄弟四人 案

世本叔向兄弟有季夙故服氏數伯華叔向叔魚季

夙正義以季夙即叔虎非也叔季兄弟之次且叔虎

已死不得與四族之數劉氏以為別有季夙而規杜

氏其言是也宰相世系曰羊舌職五子赤肸鮒虎季

夙赤字伯華肸字叔向鮒字叔魚虎字叔罷號芊舌

四族

揚肸 漢名臣奏載張衡說云晉大夫食采於揚為揚

氏食我有罪而揚氏滅揚字从手不从木宰相世系

曰晉公族食邑於芊舌凡三縣一曰銅鞮二曰揚氏

三曰平陽

六年傳昔先王議事以制不為刑辟 李奇曰先議其

犯事議定然後乃斷其罪不為一成之刑著於鼎也

聳之以行 漢書引此傳作懞晉灼曰古悚字 裴光遠

以懞為悚 案十九年傳云駟氏聳說文引作懞云懼

也从心雙省聲 說文耳部云生而聳曰聳 因驗左氏

古文為後人竄易者多矣

商有亂政而作湯刑 汲郡古文曰祖甲二十四年重

作湯刑外傳云元王勤商十有四世帝甲亂之七世

而隕祖甲賢君事見尚書止以改作湯刑故云亂之
呂氏春秋孝行覽云商書曰刑三百罪莫大於不孝
高誘曰商湯所制法也荀子正名篇云刑名從商康
誥云殷罰有倫蓋自祖甲以後刑始頗矣

周有亂政而作九刑注周之衰亦謂之刑書謂之九刑

案九刑者刑書有九篇成王時所造見周書周衰重

作之定為成科亦若祖甲之作湯刑也

火未出而作火以鑄刑器藏爭辟焉火如漢書象之不

火何為古春秋左氏說曰火星出於周五月而鄭

以三月作火鑄鼎刻刑辟書以為民約是為刑器爭

辟故火星出與五行之火爭明為災其象然也服氏

解詁从其說棟案漢書五行志許叔重五經異義所

載左氏說及古春秋左氏說皆前漢諸儒傳左氏者

之言唐人正義以為賈逵非也顧君補正亦采五行

志數條而不言左氏說沒其義矣

寡君以為驩也左氏懽字皆作驩此古文之異者高

誘戰國策注云懽猶合也

見於左師子惠子曰向戌與寺人比而害太子華亥

與寺人比而逐右師戌亥黨寺人則同而戌之罪浮

于亥也戌不思前事而責亥此目睫之論耳其後元

公并逐華向有以哉

以其棄鄭氏引馬八匹私面鄭康成曰面亦見也其

謂之面威儀質也又云私面私覲也

主不恩賓 鄭康成曰恩猶辱也杜訓為惠从小尔足

七年傳天子經畧 劉逵曰天子經畧土地定城國制

諸侯畧分界也一曰遠界為經畧也

願與諸侯落之 庾蔚之禮記畧解曰落謂與賓客燕

會以酒食澆落之

日月以冀 案索隱冀亦作幾讀曰冀

使長鬣者相注鬣須也 說文引作儼云長壯儼儼也

子惠子曰杜訓鬣為須亦臆說

正義汲冢書瑣語 案御覽備引汲冢瑣語乃共工事

非絲也

張叔皮論 張姓叔名叔曾作反論引見御覽作皮誤

也

傳余敢忘高圉亞圉注二圉周之先也為殷諸侯亦受

殷王追命者正義曰二圉之受殷命無文也 子惠

子曰二圉受命見竹書紀年棟案杜氏此注盖本汲

郡古文外傳云高圉大王能帥稷者也周人報焉故

服虔注此傳云周人不毀其廟報祭之馬融曰周人

所報而不立廟杜氏以經傳無報亞圉之文故異說

孟僖子病不能禮 今本禮上有相字 下云苟能禮者從之則相字衍

盖襲上文相儀之誤當从釋文

聖人有明德者若不當世 王肅曰武仲謂弗父何殷

湯之後而不繼世為宋君

或惟悴事國 漢書引此傳作盡頓與詩同如淳曰頓

古悴字

何謂六物對曰歲時日月星辰是謂也 服虔曰歲星

之神左行于地十二歲而一周時四時也日十日也

月十二月也星二十八宿也辰十二辰也是為六物

八年傳或馮焉 子惠子曰漢書引云神或馮焉案注

當有神字

莫保其性 宋淳化元年本保作信案漢書五行志引

此傳亦作信顏籀曰信猶保也戰國策甘茂曰以曾

子之賢與母之信也而三人疑之則慈母不能信也

高誘曰信猶保也

商衛 子惠子曰宋衛稱商衛踊為定公諱也昭公事

當紀于定公時也

寘德於遂 世本曰陳舜後宋忠曰虞思之後箕伯直

柄中衰殷湯封遂於陳以祀舜

自幕至于瞽瞍無違命 賈逵曰幕舜後虞思也至于

瞽瞍無聞違天命以廢絕鄭衆曰幕舜之先也裴駟

從賈侍中說杜用先鄭說

九年傳以夷濮西田益之 京相璠曰以夷之濮西田

益也

暴蔑宗周 唐石經及宋本皆如此俗本蔑作滅非

辰在子卯謂之疾日 賈逵曰桀以乙卯凶紂以甲子
喪惡以為戒張晏曰云夏殷以乙卯不推湯武以興此
說非也翼奉曰北方好行貪狼申子主之東方怒行
陰賊亥卯主之貪狼必待陰賊而後動陰賊必待貪
狼而後用二陰並行是以王者忌子卯也禮經避之
春秋諱焉孟康曰北方水生於申盛於子東方木
木生於亥盛於卯李奇曰北方卯也卯又陰賊故為
二陰王者忌之不舉樂翼奉又言師法用辰不用日
甲乙為日子卯為辰故云辰在子卯
孟僖子如齊殷聘 大行人職云凡諸侯之邦交歲相
問也殷相聘也鄭氏注云小問曰問殷中也久無事

又於殷朝者及而相聘也先鄭引此傳以證之服虔
云殷中也自襄二十年叔老聘於齊至今積二十年
故中復脩盛聘之禮

十年傳邑姜晉之妣也 李厚菴曰邗應韓皆無國矣
武之穆惟晉存故曰邑姜晉之妣也然不自齊者以
出于嫠女故推本邑姜

齊惠樂高氏 棟案惠公子樂堅高祈後皆為氏故云
樂高詳襄廿七年注 正義作子樂子高蓋
樂高字堅祈名也
彊於陳鮑氏 尔足曰彊當也言其族盛與陳鮑相當
值

請斷三尺焉而用之 服虔曰斷三尺使至於較

孤斬焉在衰經之中注既葬未卒哭故猶服斬衰 家君曰預既葬除喪之說至此乃窮故復作遁辭下云喪禮未畢如預說則卒哭而喪禮遂畢乎葬與卒哭為時無幾諸大夫何不少待

十一年經厥怒釋文云怒魚斬反徐五巾反 棟案公羊作屈銀是怒讀為銀徐音是也說文云怒从心秋聲又犬部云秋从犬來聲讀又若銀是古音皆以怒為銀

傳擇子莫若父擇臣莫若君 管子大匡云鮑叔曰先人有曰知子莫若父知臣莫若君 五大不在邊五細不在庭 此當用賈逵鄭衆之注

鄭京櫟實殺曼伯注厲公得櫟又并京 案楚語范無宇曰叔段以京患嚴公鄭幾不封櫟人實使鄭子不且得其位明京屬叔段櫟屬厲公左氏約舊史而為傳取其文勢之便兼舉京櫟而單舉曼伯此傳之漏義得櫟并京既無明文何必遷就而曲為之說也 十二年傳司墓之室有當道者 家君云周官墓大夫帥其屬而巡墓居其中之室以守之故云司墓之室有當道者 請免喪而後聽命 此與下六月葬鄭簡公杜二注繆戾皆當刪之李厚菴曰未葬而朝晉有是理乎李以傳為未可信棟謂非傳之誤乃杜以免喪之語而移

其傳之次也

六月葬鄭簡公 杜注云經書五月誤此謬耳古文左傳當在齊侯衛侯鄭伯如晉之前鄭伯欲如晉故速葬而往杜預欲附會短喪之說而移其次于後耳亂左氏者非預而誰

供養三德為善 董遇注本為共養解云盡其所以養成三德棟謂古供字作共董季直本是也訓為盡共恐未然三德謂黃裳元也注亦誤

且可飾乎 漢儒言易以黃裳元吉為坤五降乾二乾二升坤五故曰且可飾乎

司馬袞 唐石經作督釋文音篤云本亦作袞棟案督

與袞通說文云袞背縫莊子養生云緣督以為經亦謂背縫也方言云繞緇謂之襦掩郭氏云衣督脊也

王孫牟注衛康叔子康伯 世本云衛康伯名髡宋忠曰即王孫牟也事周康王為大夫司馬貞曰牟髡聲相近故不同耳譙周古史考無康伯而云子牟伯立蓋以不空父子俱謚康故因其名曰牟伯也棟案馬融王肅尚書傳皆云康國名在千里之幾內既滅管叔更封為衛侯其子始以康為謚索隱之說未盡然

鍼秘 高誘曰鍼音七

摩厲以須 說文曰摩斫也从手麻聲

祗宮 子惠子曰祗宮在南鄭見竹書

祈招之惓惓 韓詩章句曰惓惓相悅兒李登聲類曰

惓惓和靜兒

形民之力 家語作刑案古刑字皆作形王肅曰形以

刑傷民力

十三年傳將欲入郕 服虔曰郕別都

卜尹 服虔曰卜尹卜師大夫官

康王跨之 服虔曰兩足各跨壁一邊

再拜皆厭紐 王充曰後共王死招為康王 昭傳作至子

失之圍為靈王 圍當作及身而弑子千為王 昭當作十有

餘日子暫不立又懼誅死皆絕無後棄疾立竟續楚

祀如其神符

城外屬焉 史記云方城外屬焉故杜注云城方城也

苛慝不作釋文云苛音何本或作荷 棟案古苛字本

作荷檀弓曰泰山婦人曰無苛政釋文曰苛本亦作

荷毛詩序云哀刑政之荷今本作苛漢書酈食其傳

云好荷禮師古曰荷與苛同漢張表碑亦以荷為苛

齊桓晉文不亦是乎 服虔曰皆庶子而出奔

鄭伯男也 董仲舒春秋繁露云周爵五等春秋三等

合伯子男為一爵故云伯男外傳作伯南古南男字

通 公羊桓十一年鄭忽出奔衛傳云忽何以名春

秋伯子男一也辭無所貶何休云春秋改周之文從

殷之質合伯子男為一

子服湫從湫徐邈音椒 案湫本與椒同音說文湫从
 水秋聲荀卿子引詩曰鳳凰秋秋其翼若干其聲若
 簫秋與簫協韻明秋亦作椒音惠伯名椒獨此作湫
 者聲之誤也晉以來唯徐仙民識古諸儒皆不及也
 文九年經楚子使椒來聘穀梁椒作菽五經文字云
 菽子遙及見穀梁及春秋左氏傳史記伍子胥列傳
 云夫差二年敗越于夫湫注云湫音椒今傳作椒古
 今人表有楚湫舉師古云即椒舉周語亦作湫舉
 及中人注中山望都縣西北有中人城 杜此注本京
 相璠春秋土地名鄆元謂望都城東有一城名堯始
 城本無中山之傳璠或以為中人未詳張華博物志
 曰中人在唐縣西四十里
 十四年傳司徒老祁慮癸 當用服虔注

然丹簡上國之兵 鄭康成曰簡謂比數之

收介特注介特單身民也 馬融廣成頌察淫侈之華

譽顧介特之實功注介特謂孤介特立也杜氏以為

單身民非馬義也

蔽罪邢侯 先鄭引曰弊獄邢侯

紂也鬻獄 周書鄭保曰十敗六曰佞說鬻獄韋昭曰

鬻賣也

乃施邢侯 服虔曰施罪於邢侯施猶効也邢侯凶故

効之韋昭曰施捕也周禮卿士云辨其獄訟異其死

刑之罪而要之鄭氏云要之為其罪法之要辭如今

効矣晉語云秦人殺冀芮而施之韋昭云陳尸曰施

愚謂施陳也謂殺而陳其罪哀廿七年傳云周人施公孫有山氏是羅泌曰施者殺而肆之也內則施羊亦如之施麋施鹿施膚皆如牛羊秦施冀芮晉施邢侯與叔魚於市山海經殺而施之晉語入從欒氏者大戮施莊子云甚弘脗史拖陳餘蓋同也開元五經文字作弛云廢亦非

十五年傳吾見赤黑之禋非祭祥也喪氣也禋說文引作禋云精氣感祥以示侵省聲王逸楚辭章句云禋惡氣貌韋昭曰氛禋氣象也凶曰氛吉日祥

叔氏顏籀曰叔父之使故謂之叔氏
闕鞏之甲說文引作砮从石珣聲
定四年傳封唐叔以闕砮同

及辛有之二子董之晉晉語曰秦伯納公子董因迎於河韋昭曰因晉大夫周太史辛有之後也引此傳為證

王一歲而有三年之喪二焉子惠子曰喪妻三年春秋之末造也事見墨子棟案墨子公孟篇云子墨子謂公孟子曰喪禮君與父母妻後子死三年喪服伯父叔父兄弟期族人五月姑姊舅甥皆有數月之喪後子為後之子猶太子也又非儒篇云儒者曰親親有術尊賢有等言親疎尊卑之異也其禮曰喪父母三年妻後子三年伯父叔父弟兄庶子其戚族人五月若以親疏為歲月之數則親者多而疏者少矣是

妻後子與父同也若以尊卑為歲月數則是尊其妻
子與父母同而親伯父宗兄而卑子也逆孰大焉墨
子所據喪禮與傳合與喪服傳異喪服傳云父必三
年然後娶達子之志也又云為妻何以期也妻至親
也必三年然後娶不得為三年喪服也且天子絕期
安得引以為證公益子即公明儀

三年之喪雖貴遂服注天子諸侯除喪當在卒哭今王
既葬而除故譏其不遂雖貴遂服指后世子之喪
若父母之喪無貴賤一也安得為此抑揚之語乎預
邪說亂經孔氏扶非皆不足取

十六年傳幾為之笑而不陵我當用服注

刑之頗類服虔曰類讀為類頗偏也類不平也

宣子有環其一在鄭商注玉環同工共朴自共為雙

淮南子曰元玉同工高誘曰二玉為一工故云同工

昭州卅二年傳云賜子家雙琥倉頡篇云雙玉為珏

是共朴也

不亦銳乎注銳細小也正義曰說文云銳芒也鋒芒尖
故為細小言得利小也服虔云銳拆也銳是鋒芒不
得為拆自說文云至銳拆也二十四字今本脫去
宋本有之故備錄焉

執政弗義高誘戰國策注云弗義不以為義也

庸次比耦庸傭也廣雅次比代也言代為傭代為耕

左補注五

也

習實為常 周書曰習實為常口美惡一也

十七年傳唯正月朔至庶人走 古文左傳說曰正月

謂周六月夏四月正陽純乾之月也 慝謂陰爻也冬

至陽爻起初故曰復至建巳之月為純乾也陰爻而

陰侵陽為災重故伐故用幣責陰之禮降物素服也

不舉去樂也移時避正堂須時移災復也 嗇夫掌幣

吏庶人其徒役也

少皞氏鳥名官何故也 子惠子曰周書嘗麥曰乃命

少皞清司馬鳥師以正五帝之官昭子見周志有是

言而未之詳也故問之棟案史記言黃帝二子其一

曰元囂是為青陽降居江水張衡集條上司馬遷所

敘與典籍不合者十餘事其一事曰帝系黃帝產青

陽昌意周書曰乃命少皞清清即青陽也今宜實定

之故世本及春秋緯皆言青陽即是少皞黃帝之子

代黃帝而有天下號曰金天氏史記言青陽降居江

水不為帝故張平子正之汲郡古文云或曰少皞名

清不居帝位帥鳥師居西方以鳥紀官盖本周書之

說律歷志引考德曰少昊曰清清者黃帝之子清陽

也 考德者考五德之書也

九扈 說文作雇或作鷓籀文作鴈

請有事於雒與三塗 高誘曰三塗之山陸渾之南故

假道於周

萇弘 淮南子曰萇弘周室之執數者也天地之氣日月之行風雨之變律歷之數無所不通

天事恆象 先鄭司農曰象謂災變雲物如衆赤鳥之屬有所象似易曰天垂象見吉凶

夏數得天 周書周月曰萬物春生夏長秋收冬藏天

地之正四時之極不易之道夏數得天百王所同商

周改正以垂三統至於敬授民時巡守祭享猶自夏

焉故易乾鑿度曰三王之郊一用夏正

若火作其四國當之 唐石經此下又云六物之占御

覽八百七十五卷所引有此四字蓋據賈服本如此

案石經四字旁增當是晁公武據蜀石經增入晁曾以蜀石經校唐石經碑中所增疑皆出晁氏之手學者詳焉蓋蜀時或服虔左氏猶存也

水火之壯也其以丙子若壬午作乎水火所以合也

子惠子曰水為夫火為妻夫從妻所好故以合日為災

十八年傳毛得以濟侈於王都 薛綜曰濟謂度也度

於奢侈謂僭也

是謂融風火之始也注東北曰融風 淮南子墜形曰

東北曰炎風高誘曰艮氣所生也一曰融風張晏曰

融風立春木風也火之母也火所始生也

七日其火作乎 張晏曰火以七為紀

使司寇出新客禁舊客勿出於宮 高誘曰有新客按
出之為觀釁也禁舊客為露情也

屏攝 韋昭曰周氏云屏者并攝主人之位昭謂屏屏
風也攝形如要扇皆所以分別尊卑為祭祀之位近
漢亦然先鄭司農曰攝束茅以為屏祭神之處草易
然故巡行之案周氏者漢儒說春秋者周仲文也

祈于四鄘 案鄘水庸也

十九年傳許悼公瘡 服虔曰悼公靈公之子許男買
瘡寒疾也

書曰弑其君 服虔曰禮醫不三世不使君有疾飲藥
臣先嘗之親有疾飲藥子先嘗之公疾未瘳而止進

藥雖嘗而不由醫而卒故國史書弑告於諸侯

若大城城父而寘太子焉以通北方王收南方 高誘
曰城父楚北境之邑今屬沛國北方宋鄭魯衛也南
方謂吳越也

駟氏聳 說文引作懼云懼也廣韻引作懼詳六年注
諺曰無過亂門 呂覽引詩云無過亂門所以遠之也
高誘曰逸詩

沈尹戌注莊王曾孫葉公諸梁父也 王符潜夫論曰
左司馬戌者莊王之曾孫也葉公諸梁者戌之第三
弟也高誘呂覽注曰沈尹戌莊王之孫沈諸梁葉公
子高之父也三說不同

廿年傳自以為猶宋鄭也 高誘呂覽注曰猶如也
其事集矣 高誘曰集合也

棠君尚 風俗通作堂云堂楚邑大夫伍尚為之其後

氏馬廣韻案堂與棠古字通見魯峻碑

賓將擗 杜子春引作趣讀為造次之造謂擊鼓夜戒

守也又云趣與造音相近造與遭同故云故曰終夕

與燎賈公彥曰賈服讀字與子春異棟案子春受學

于劉歆歆傳左氏春秋以趣為擗心有據依史記亦

擗賈服後于劉杜唐人咸所尊尚故不以其說

終夕與於燎 於字衍當从釋文刪古本無於字杜子

春注可據

若琴瑟之專壹 董遇本作搏司馬貞曰搏古專字管

子內業史記樂書皆以搏為專

蒲姑氏 亦作薄姑古文通闕駟曰周成王時薄姑與

四國作亂周公滅之以封太公陸澄地理書曰呂尚

封於齊郡薄姑故城在臨菑縣西北五十里近濟水

取人于萑苻之澤 唐石經初刻作藿蒲後改萑苻案

韓非子內儲說引此事作藿詩小弁曰萑葦淠淠韓

詩作藿外古字通也

遺愛 賈逵曰愛惠也

廿一年傳天子省風以作樂 應邵曰風土地風俗也

有中和之風以作樂然後可移惡風易惡俗也

小者不窕 高誘呂覽注云窕不滿密也

窕則不咸 釋文云本或作感漢書同唐石經初刻作

咸後作減愚案咸本古文感故下云心是以感从咸

為是也

王心弗堪 漢書作咸孟康曰古湛字尚書西伯戡黎

說文引作咸郭璞介正注又作堪黎釋文本古字咸

堪通詳見尚書考

張句尤之 小介正云尤怪也杜訓從之

是何物也注物事也 子惠子曰歲時日月星辰謂之

六物是何物也謂六物之占當何屬也注未詳

鄭翩願為鸛 陸佃引舊說江淮謂羣鸛旋飛為鸛井

則鸛善旋飛盤薄霄漢與鷺之成列正異故古之陳

法或願為鸛也

不死伍棄 衛詩曰死生契濶與子成說鄭箋云從軍

之士與其伍約死也尉繚子云凡伍臨陳若一人有

不進死於敵則赦者如犯法者之罪

軍之大刑也 周禮條狼氏職曰凡誓執鞭以趣於前

且命之誓僕右曰殺誓馭曰車輶

廿二年傳盟于稷門之外 劉向別錄曰齊有稷門齊

城門也齊地記曰齊城西門側系水出故曰稷門古

側稷音近耳司馬貞云棟紫稷齊地名昭十年傳云

戰于稷顧炎武曰七國時齊有稷下館

鄆肸伐皇 肸周大夫 水經注 食采于鄆因氏焉說文
鄆周邑

焚諸王城之市 焚如之刑周法也

敗績于前城 服虔曰前讀為泉周地也京相璠曰今

洛陽西南五十里伊闕外前亭

毀其西南 顧炎武曰唐石經此下有子朝奔郊四字

棟案碑四字非初刻當是晁公武據蜀石經增入非

杜本也案下傳云二師圍郊鄆潰杜氏云二邑皆

子朝所得是杜本無奔郊之文

廿三年經狄泉注時在城外 京相璠曰今大倉西南

地水名狄泉舊說狄泉本在洛陽北萇弘城成周乃

繞之

傳尹辛敗劉師于唐 司馬彪郡國志云洛陽有唐聚

去備薄威 尉繚子曰兵有去備徹威而勝者以其有

法故

先君之力可濟也 服虔曰獻公亦欲立子猛不欲令

子朝得國今南宮極震死為天所弃先君之功事可

成也

遠滋注楚地 酈元曰服虔或謂之邑又謂之地京相

璠亦云水際及邊地名也禹貢曰道漢水過三澨春

秋傳有句澨雍澨及此而三 水經注

明其伍侯注使民有部伍為侯望正義曰賈服王董皆

作五侯 賈逵曰五侯五方之侯也敬授民時四方
中央之侯也王肅云五侯山侯林侯澤侯川侯平地
侯也董遇云五侯四方及國中之姦謀也杜作伍侯
棟案周書程典曰協其三族固其四援明其伍侯習
其武誠依其山川通其舟車利其守務古伍字皆作
五傳本文也杜氏依周書為說故从人旁

廿四年傳今王室實蠢蠢焉 說文引作蕙蕙云亂也

三體石經作載 尚書蠢字說文引作載
古蠢字皆作載俗作蠢

日過分而陽猶不克 孟康曰謂春分後陰多陽少為
不克陽勝則盛故言甚

王子朝用成周之寶珪于河 漢書曰湛于河釋文云

本或作沈于河

與之東訾注鞏縣西南訾城是也 司馬彪曰縣有東

訾聚今名訾城王隱晉書地道記曰在縣之東

吳踵楚 依說文當作種種相迹也

左傳補註卷第五終

左傳補註

三

春秋左傳補注卷第六

廿五年經宋公佐卒于曲棘 國稱陳留志曰外黃於

春秋為宋之曲棘里故宋之別都矣

傳天地之經而民實則之 案古文孝經實作是是即

古寔字見尚書秦誓及詛楚文鄭康成詩箋云趙魏

之東寔實同聲故此傳又作實

生好物也死惡物也 周書度訓曰凡民之所好惡生

物是好死物是惡

有鸛鶴來巢書所無也 服虔曰鸛鶴不隄濟今隄宜

穴而又巢故曰書所無也

吾聞文武之世童謡有之 唐石經作文成謂魯文公

成公時也史記漢書論衡皆作文成舊本左氏傳亦有作成者若云周之文武上下數百年豈能逆知童謠為魯昭徵驗乎今本皆作文武俗誤行之久矣

徵褰與襦 方言曰袴齊魯之間謂之襪郭璞云傳云徵褰與襦音蹇

邠氏為之金距 服虔曰金距以金踏距高誘呂覽注云以利鐵作鍛距沓其距上沓即踏也又淮南子注云金距施於于距

邠昭伯 案世本昭伯名惡

臧昭伯之從弟會 賈逵曰昭伯臧伯賜也案世本臧會臧頃伯也宣叔許之孫與昭伯為從父昆弟也司

馬貞曰為讒于臧氏史記為作偽月令云無或作為淫巧注云今月令無于時作為詐偽左傳偽字亦有作為者定十二年傳云子偽不知釋文作為讀為偽

拘臧氏老 服虔曰老臧氏家之大臣

萬者二人其衆萬於季氏 吳仁傑曰淮南書亦云禱于裏廟舞者二人案傳氏言四人為列尚不成樂況二人乎人當作八傳文誤也

請以五棄也 服虔曰言棄自省約以出

日入慝作 周禮環人察軍慝康成曰慝陰姦也謂軍中有為慝者

司馬斂辰 鄭康成曰大夫家臣為司馬者

太子樂 黃伯思曰祕閣古寶器有宋公繚餼鼎考汲

冢師春書繚乃宋景公名與鼎銘合董道曰竹書有
宋景公繚而史為頭曼孫炎以繚為頭曼合聲以辨
周秦之語則繚為古文樂也

搆拊所以藉幹者 說文引云搆部薦幹云搆部方木
也幹脅也

計於季氏 上計也

廿六年傳百兩一布 先鄭云布泉也墨子曰商人用

一布布不敢繼苟而讎焉必擇良者

齊子淵捷 王符曰齊子淵氏姜姓

鑿而棄於它車注鑿一足行正義云說文云鑿金聲也

棟案說文鑿讀若春秋傳曰鑿而棄它車則傳本

作鑿 五經文字 故杜氏訓為一足行若从金輕聲與

斷足無涉必傳寫之譌正義失考

女寬 韋昭曰女齊之子叔褒

是亂國而惡君王也 服虔曰廢而不立是謂亂國追

惡君王也

國有外援不可黷也 服虔曰外援謂太子任秦之外

孫黷易也秦為任外援不可易

奉周之典籍以奔楚 周之典籍盡在楚矣三墳五典

八索九邱左史倚相觀射父讀之而楚擣杙之書頗

可觀國語采之流及屈宋而楚騷比于周雅書之益

人如是乎

王愆于厥身 汲郡古文云夷王八年王有疾諸侯祈
于山川王陟

諸侯釋位以間王政 服虔曰諸侯釋其私政而佐王
政案閒氣為臣故云閒

宣王有志 鄭康成周禮注云志古文識有志謂長而
有知識也王伯厚以為有撥亂之志恐非外傳曰宣
王長而立之彘之亂宣王尚少至始有知識乃授之
政猶周公復子明辟也

貫瀆鬼神 說文引作攢訓與杜同

君無違德 論衡引作回德回邪也與下文回亂合

廿七年傳與吳師遇於窮 京相璠曰今安豐有窮水

北入淮水經曰淮水又東北窮水入焉注云水出安

豐縣窮谷窮音戎唐石經窮下有谷字酈元所引同

正義曰此為定七年敗尹氏于窮谷涉彼而誤非也

左尹卻宛 王符曰卻氏之班有州氏祁氏伯宗以直

見殺其子州黎奔楚卻宛直而和故為子常所妬受

誅其子豁奔吳為太宰懲祖禰之行仍正直遇禍也

乃為詔諛而囚吳徐廣史記注云伯州犂者晉伯宗

之子也伯州犂之子曰卻宛卻宛之子曰伯豁宛亦

姓伯又別氏卻司馬貞曰卻宛州犂子伯豁卻宛子

伯氏別族案定四年傳云楚之殺卻宛也伯氏之族

出注云卻宛黨又云伯州犂之孫為吳太宰楚世家

云宛之宗姓伯氏子嚳則嚳乃宛之族也與左傳合
王符徐廣司馬貞皆以為卻宛子非也韋昭又以為
伯州犂子尤誤趙長君又以卻宛即白州犂

此時也 服虔曰時言可殺王時也

不索何獲 服虔曰不索當何時得也

我王嗣也注光吳王諸樊子也故曰我王嗣正義曰吳
世家云餘昧之子僚公子光者王諸樊之子公羊云
云世本云夷昧及僚夷昧生光服虔云夷昧生光而
廢之僚者夷昧之庶兄夷昧卒僚代立故光曰我王
嗣也是用公羊為說也杜言光吳王諸樊子用史記
為說也 棟案司馬遷採世本為史記然亦有旁采

諸國之書不與世本左傳合者今以左傳證之服氏
之說是也襄公卅一年傳吳屈狐庸曰若天所啟其
在今嗣君子有吳國者必此君之子孫實終之注云
嗣君謂夷昧則光夷昧之子審矣世本左傳本出一
人之手正義以世本多誤不足依馮豈其然乎

母老子弱是無若我何正義曰彭仲博云當言是無我
若何我母無我當如何我字當在若上 案彭注說
唐時已以此當采自服氏解詁

王使甲生於道 荀卿子曰庶士介而坐道揚倮曰庶
士軍士也介而坐道被甲坐於道側以禦非常
鉞交於胷 唐石經初刻作匈古文曾

以待天命 服虔曰待其天命之終也

不足以辱令尹 高誘呂覽注曰辱屈辱也

吾無以酬之 高誘曰酬報也

或取一乘犴焉 犴說文引作得或从干

邇無極也 邇讀為爾燕禮曰公南鄉爾卿爾大夫鄭

注云爾近也移也揖而移之近之也

使宰獻而請安注北公于大夫也 案管子幼官篇云

三千里之外諸侯世一至置大夫以為廷安齊君飲

昭公酒故使宰獻而仍用廷安之禮非卑公也杜氏

以為比公于大夫失之

廿八年傳慙使吾君聞勝與臧之死也以為快注慙發

語之音 棟案慙願也言鈞死耳願使吾君先聞二

人之死以為快注言發語音非外傳云吾慙置之於

耳以慙御人又云慙庇州犁韋昭皆訓為願大夫稱

主今稱君者蓋其臣三世仕於祁氏矣詩云不慙遺

一老箋云慙者心不欲自彊之辭也釋文云慙尔正

願也強也且也韓詩云慙閭也 慙讀為銀與寧同音

甯皆訓為願

其母欲取其黨 案論衡叔向之母姬姓

吾懲舅氏矣 列子曰北山愚公懲山北之塞出入之

迂注韓詩外傳云懲苦也

樂正后夔取之 伏生書大傳曰樂正定樂名八伯貢

樂九奏具成則自唐虞已有樂正之名尚書不詳耳
成鱣曰昔武王克商光有天下其兄弟之國者十有五
人姬姓之國者四十人案荀子以為天下立七十
一國姬姓獨居五十三人與此異也
心能制義曰度服虔曰心能制事使得其宜言善揆
度事也棟案自此至經緯天地曰文皆見周書謚法
惟闕曰莫曰君張守節所引謚法云賞慶刑威曰君
孔晁注云能行四者德正應和曰莫注云正其德應
其和
德正應和曰莫服虔曰在已為德施行為正發號施
令天下皆應和之言皆莫然無謹謹也

昭臨四方曰明服虔曰豫見安危也
教誨不倦曰長服虔曰教誨人以善不懈倦言善長
以道德也

慈和徧服曰順服虔曰上愛下曰慈和中和也為上
而愛下行之以中和天下徧服從而順之
擇善而從之曰比服虔曰比方損益古今之宜而從
之

經緯天下曰文服虔曰德能經緯順從天地之道故
曰文

闔沒韋昭曰闔沒闔明
不夕食服虔曰昨顧酒醉故不夕食案二人謂昨不

左補言

夕食故始饋而恐不足耳杜注不及服氏之分明屬厭而已 韋昭曰屬適也厭飽也已止也適小飽足則自節止

廿九年傳主君 服虔曰大夫稱主

秦龍氏御龍氏 賈逵曰秦養也穀食曰秦

乃擾畜龍 應劭曰擾音柔擾馴也能順養得其嗜慾

案玉篇擾當作攪 尚書擾而穀徐廣曰擾一作柔字 本作攪音柔今人字與音皆失之

廣雅曰 馴擾也

其後有劉累 後古文作后服虔曰后劉累之為諸侯者夏后賜之姓

以更豕韋之後 史記更作受夏本紀周禮巾車云歲時

受讀杜子春云受當為更儀禮燕禮及大射儀注皆

云古文更為受是更與受古今字也 汲郡古文云孔

氏使劉累 秦龍

魯縣 汲郡古文曰孔甲七年劉累遷於魯陽班固曰

南陽魯陽縣有魯山古魯縣御龍氏所遷

遂濟窮桑 服虔曰濟渡也言四叔子孫世不失職遂

渡少暎之世

遂賦晉國一鼓鐵以鑄刑鼎 服虔曰鼓量名也曲禮

曰獻米者操量鼓取晉國一鼓鐵以鑄之禮記音義

隱義曰東海樂浪人呼容十二石者為鼓以量米王

肅曰三十斤謂之鈞鈞四謂之石石四謂之鼓與隱

左補注

義合顧氏云盖用四百八十斤鐵

卅一年傳十二月辛亥朔日有食之是夜也趙簡子夢童子羸而轉以歌且古諸史墨曰吾夢如是今而日食何也對曰六年及此月也吳其入郢子終亦弗克入郢必以庚辰日月在辰尾庚午之日始有謫火勝金故弗克服虔曰是歲歲在析木後六年在大梁大梁水宗十一月日在星紀為吳國分楚之先顓頊之子老童童子楚象行歌象楚走吳姬姓日日在星紀星紀之分姬姓吳也楚衰則吳得志吳世世與楚怨楚走去其國故曰吳其入郢吳屬水水數六十月水位故曰六年及此月也有適而食故知吳終亦

不克後六年定四年十一月閏餘十七閏在四月後其十一月晦庚辰吳入郢在立冬後復此月也十二月辛亥日會月於龍尾而食庚午日初有適故曰庚辰一曰日月在辰尾尾為凶臣是歲吳始用子胥之謀以伐楚故天垂象午火庚金也火當勝金而反有適故為不克晉諸侯之霸與楚同盟趙簡子為執政之卿遠夷將伐同盟日應之食故夢發簡子周禮占夢職以日月星辰占六夢之吉凶鄭注云日月星辰謂日月之行及合辰所在春秋昭三十一年史墨云云此以日月星辰占夢者其術則今八會其遺象也鄭志張逸問占夢注云云不知何術占之前問不

左補注

了前問載鄭志今無考答曰日月在辰尾夏之九月辰在房末

有尾星建戌厥寅建戌則辰在卯寅與申對辰與戌

對對酒也申近庚孝經援神契曰斗指申處暑指庚白露故知申近庚辰與戌對

故知庚辰辰下為主人故知為主人翼奉曰辰為客時為主人金

侵火故不勝雖不勝即復故云弗克日有適氣時九

月節者以庚午在甲子篇辛亥在甲辰篇也古五子書每甲

為一篇也中有甲戌甲申甲午成一月也從庚午以下四

日從甲辰至辛亥八日并之十二日通同四十二日

如是庚午之日當在八月十九日故言時得九月節

也言雖不勝即復者以其庚金午火位相連故云雖

不勝即復也言雖不勝者吳君臣爭宮秦救復至不

能定楚是其不勝不能損吳是明即復也問曰何知

有此厭對之義乎答曰按堪輿黃帝問天老事云藝

志堪輿金四月陽建於己破於亥己亥為對陰建於

未破於癸是為陽破陰陰破陽故四月有癸亥為陰

陽交會十月丁巳為陰陽交會言未破癸者即未

與丑對而近癸也援神契曰斗指癸小寒指丑大寒故知丑近癸為未所破也交

會惟有四月十月也若有變異之時十二月皆有建

厭對配之義也問曰周之十二月夏之十月 夏體

正應在折木而云在星紀何答曰據此月中有十一

月節折木十一月星紀十一月故舉言之成長以為誤也 賈公

彥曰今八會其遺象者按堪輿大會有八小會亦有

左補注

八賈不疏八會者賈蓋據鄭志唐時堪輿已以故不詳也案越絕書言太歲八會淮南天文曰北斗之神有雌雄十一月始建於子月從一辰雄左行雖右行五月合午謀刑十一月合子謀德太陰所居辰為厭日雄為建雌為厭厭在厭日不可以舉百事堪輿徐日前一次謂之陰建行雄以音知雌故為奇辰數從甲子始子母相求所合之處為合十日十二辰周六十日凡八合合於歲前則死凶合於歲後則無殃即八會法也蓋六十日之中大合八小合八詳禮說

卅二年傳史墨曰不及四十年越其有吳乎越得歲而吳伐之必受其凶服虔曰歲在星紀吳越之分野

蔡復之歲歲在大會距此十九年昭十五年有事於武宮之歲龍度天門龍歲星也天門在戌是歲越過故使今年越得歲龍東方宿天德之貴神其所在之國兵必昌向之以兵則凶吳越同次吳先舉兵故凶也或歲星在越分中故云得歲史墨知不及四十年越有吳者以其歲星十二年一周天存凶之數不過三紀三者天地人之數故歲星三周星紀至玄枵哀二十二年越滅吳至此三十八年

遲速衰序注衰差也案襄廿九年正義云衰者差也九章算術謂差分為衰分是衰與差通故訓衰為差士冠禮記云以官爵人德之殺也注云殺猶衰也亦

以衰為差

定二年傳闔乞肉焉

子惠子曰諸侯燕禮賓醉而出

必取所薦脯重君賜也以所執脯賜鐘人于門內雷

廣君惠也夷射姑私出無脯奪技敲闔無禮甚矣

三年傳闔以餅水沃廷

韓非子云損水即門雷下類

溺者之狀

有兩肅爽馬

子惠子曰當用賈逵注載見正義漢注

多舊典遺言杜預盡去之而益以臆說正義所載者

千百之十一而已

四年經許遷于容城

地理志南郡華容縣應劭曰春

秋許遷于容城是

戰于柏舉

高誘呂覽注云柏舉楚鄙邑京相璠曰柏

舉漢東地夏有沮水或作舉疑即此也

柏二傳皆

作伯郭璞穆天子傳注云古伯字多从木

傳社稷不動 劉炫以社稷動為軍行是也杜注非

君以軍行祓社釁鼓 案即周禮大祝所謂設軍社也

夏后氏之璜 高誘曰半圭曰璜夏后氏之珍玉也

封父之繁弱 鄭康成曰封父國名荀卿子曰繁弱鉅

黍古之良弓也繁亦作蕃古字通上林賦云彎繁弱

文穎曰蕃弱夏后氏良弓之名

備物典筴釋文云本又作冊或作箒 說文云冊符命

也諸侯進受於王也象其札一長一短中有二編之

形古文作籒从竹个作策从俗

命以伯禽 當用劉炫說伯禽唐誥百篇不載封伯禽

事別見洛誥唐叔有歸禾故皆不載也 孔子刪書亦用春秋一書

不再書之例

管蔡啟商基閒王室注基毒也 棟案基當訓為教 宣

二年注訓言管蔡開商叛周之心而教之棄閒以圖

王室張衡西京賦云天啟其心人基之謀與傳意合

左傳基字凡四見宣十二年傳楚人基之當依說文

作昇哀元年傳少康基澆當訓為毒 說文云廿七年

傳趙襄子基知伯當訓為忌 小余足云此傳當訓為

教 小余足云杜唯哀元年注得之餘皆非也

無始亂 賈逵曰無為亂始

還塞大隧直轅冥阨 案冥阨九塞之一高誘曰在楚

史記蘇秦傳云塞鄙阨徐廣曰鄙江夏鄙縣棟謂鄙

阨即冥阨也墨子非攻篇曰吳闔閭次注林出於冥

隘之徑 隘即阨傳戰於柏舉中楚國而朝當子常不

從司馬之計濟漢轉戰至於柏舉其時吳已出隘而

西楚事不可為矣

季芊舟我 當用服虔注

申包胥 服虔曰楚大夫王孫包胥

封豕長蛇 高誘曰封大也豕蛇喻貪也

虐始於楚 高誘曰虐害也始先也言將以次至秦也

五年傳陽虎將以璵璠斂 高誘曰璵璠君佩玉也昭
公在外平子行君事人宗廟佩璵璠故用之正義曰
璵璠是一玉名案說文孔子曰美哉璵璠遠而望之
與若也近而視之瑟若也一則理勝一則孚勝明是
兩王正義非也

改步改玉 周語襄王謂晉文公曰先民有言曰改玉
改行韋昭曰玉佩玉所以節行步也君臣尊卑遲速
有節案荀子玉霸篇云國者世所以新者也是憚憚
非變也改王改行也與周語同是玉從古文作王成
二年齊侯朝于晉將授玉玉本作王故張平子誤以
為尊晉侯為王乃知古文春秋玉字皆作王也

公山不狃 王符曰公山氏魯公族姬姓

奔楚為堂谿氏 王符曰堂谿谿名在西平司馬彪郡

國志云汝南吳房有堂谿亭廣韻引作棠古字通

藍尹亶涉其帑 廣韻引世本云楚大夫涉其帑則亶

帑為二人然外傳云載其帑則帑非人名未知世本

何據

六年經仲孫忌 賈逵曰公羊曰仲孫何忌公羊疏云

賈經無何字案下經云仲孫忌當無何字

傳小帷子 呂覽云小帷子陸氏釋文云本又作帷

八年傳士皆坐列 案坐謂坐作列謂表正行列司馬法云

徒以坐固又
云行慎行列

吾志其目也 鄭康成云志意所擬度也商書曰若射之有志

主人焚衝 高誘淮南子注曰衝車大鐵著其轅端馬被甲車被兵所以衝於敵城也

或濡馬褐以救之注馬褐馬衣 高誘淮南子注曰褐毛布如今之馬衣

按衛侯之手及挽 說文云按推也挽唐石經初刻从定本後作腕腕俗字也經傳皆作擊郊祀志云海

燕齊之間莫不搯擊游俠傳云搯擊而游談師古曰擊古手腕字說文曰擊手擊也从手取聲今傳作挽

者儀禮士喪禮云設決麗于擊今作擊字之誤鄭康成注云

古文擊作挽史記樊於期偏袒搯挽索隱曰挽古腕

字史記多古文今人知者鮮矣高誘呂覽注云擊讀如捲挽之挽

戒都車 案戒讀為馘鄭康成云疾雷擊鼓曰馘易歸

藏曰君子戒車小人戒徒

林楚怒馬 高誘曰怒讀如强弩之弩方言曰弩猶怒

也匡謬正俗曰怒字古讀有二音今山東河北人讀

書但知怒有去聲不言本有二讀曾不尋究失其真

矣

子言辨舍爵 辨古文徧

陽虎入于謹陽關以叛 謹應劭引作鄣云今泰山鉅

平縣陽關亭是也

九年傳茲陽貨所欲傾覆也 韓非子載其語曰陽虎
有寵於季氏而欲伐季孫貪其家也今君富於季而
齊大於魯陽貨所以盡詐也

載蔥靈 賈逵云蔥靈衣車也尚書大傳云未命為士
不得有飛輪鄭康成注云如今窻車也輪與靈古字
通

趙氏其世有亂乎 此語非實事春秋後事左氏不及
知故云然案韓非子曰陽貨逐於魯疑於齊走而之
趙趙簡主迎而相之左右曰虎善竊人國政何故相
也簡主曰陽貨務取之我務守之遂執術而御之陽
貨不敢為非以善事簡主與主之強幾至於霸也

吾從子如驂之靳 毛詩小戎云游環脅驅傳云游環
靳環也沈重曰靳者言無常處游在驂馬背上以驂
馬外纏貫之以止驂之出猛蓋言靳所以輔驂非相
違也而相從也何仇難之有

龜焦 焦說文引作龜云龜龜不兆龜讀若焦 哀二年
龜變同

哲憤 傳遜曰哲白哲憤以巾髮卑賤所服此說非也
古者有冠無憤秦漢以來始有其制此傳憤字說文
引作齷云齒相值也故杜訓從之古省或以憤為齷
衣狸製注製裘也 子惠子曰說苑吳赤市使於智氏
假道於衛甯文子具紵絺三百製將以送之左傳狸
製注云裘此云紵絺非裘也乃衣耳裘名為製不見

經傳疑杜注誤棟案傳曰狸製故注云裘謂狸裘也
哀廿七年陳成子救鄭及濮雨成子衣製杖戈注云
製雨衣也杜皆望文為義然以製為裘似有脫文
十年經鄆謹龜陰田 服虔曰三田汶陽田也龜山名
陰之田得其田不得其山也
傳步左右皆至 劉熙曰徐行曰步步捕也如有所伺
捕務安詳也
叔孫氏之甲有物注物識也 周禮閭人職云潛服賊
器不入官注云賊器盜賊之任器兵物皆有刻識棟
案刻識之語出于漢時梁冀傳云刻其毛以為識是
也

十二年傳登武子之臺 酈元曰曲阜上有季氏宅宅
有武子臺王肅曰季孫宿所築
十三年傳歸告其父兄 服虔曰午之諸父兄及邯鄲
中長老
戌也驕注戌文子之子 世本曰衛獻公生成子當當
生文子拔傳作發拔生朱為公叔氏鄭康成云朱春秋
作戌
十四年傳使死士 戰國策蘇秦曰厚養死士高誘曰
死士勇戰之士也先鄭司農曰死士欲以死報恩者
大公六韜曰有貧窮忿怒欲快其志者聚為一卒名
曰必死之士賈景伯以死士為死罪人非也

哀元年傳如子西之素 案功命日謂之素宣十一年
令尹蒍艾獵城圻三旬而成不愆于素是也

蔡人男女以辨 辨讀曰班徐廣史記注曰辨音班漢
書王莽傳辨社諸侯義作班襄廿五年傳云男女以
班賂晉侯劉炫曰哀元年蔡人男女以辨與此同士
虞禮曰明日以其班祔鄭康成云古文班或為辨是
辨為古文班也

敗越于夫椒 賈逵曰夫椒越地杜氏云夫椒吳縣西
南大湖中椒山司馬貞曰賈說得之杜以為大湖椒
山非戰所夫椒與椒不得一旦夫差以報越為志又
伐越當在越地何乃不離吳境迤在大湖中又案越

語云敗五湖也

大夫種 高誘曰大夫種姓文字會楚鄞人

樹德莫如滋去疾莫如盡 戰國策引書曰樹德莫如

滋除害莫如盡今在大誓與此異

滅夏后相 汲郡古文曰帝相九年居於斟灌廿六年

寒浞使其子澆帥師滅斟灌廿八年寒浞使其子澆

弑帝公羊傳云君死于位曰滅

生少康焉 服虔曰后緡遺腹子

而邑諸綸 司馬彪郡國志曰梁國虞縣有綸城少康

邑

以收夏衆撫其官職 服虔曰因此基業稍收取夏遺

民餘衆撫脩夏之故官憲典

祀夏配天不失舊物 服虔曰以鯀配天也物職也

注猶言天與不取 漢書蕭何曰書云天與不取反受

其咎

欲與楚者右 此與絳侯右袒意同懷公意欲從吳故

使與楚者右

在軍執食者分而後聽食 案劉向說苑載此事云在

軍食孰者半而後食故服虔注云以其半分軍士而

後自食其餘若簞醪注流也公羊傳曰師喪分焉分

亦訓半杜訓為徧古訓之亾自杜始

二年傳郢不足以辱社稷 服虔曰郢自謂己無德不

足立以汚辱社稷

八人衰經偽自衛逆者 服虔曰衰經為若從衛來迎

太子也較杜注為明

上大夫受縣下大夫受郡 周書作維曰國方千里分

以百縣縣有四郡郡有四鄙高誘曰周制天子地方

千里分為百縣縣有四郡郡有四鄙故言上大夫受

縣下大夫受郡周時縣大郡小秦始皇兼天下初置

三十六郡以監縣耳

志父 注志父趙簡子之一名也杜意言趙鞅一名志

父今俗本作改名誤

桐棺三寸不設屬辟 荀卿子曰罪人之葬棺椁三寸

衣衾三領不得飾棺鄭玄引此傳作屬柳

撲馬荀卿子云若馭撲馬揚倮曰未調習之馬

羅無勇麋之廣韻引作麋八年傳云及潞麋之注云麋亦束縛疑麋麋字通

無折骨無面傷鄭仲師引云無破骨無面夷案外傳

晉惠公韓之誓曰將止無面夷死此求勝之辭故云

無面夷

大命不敢請晉語曰死不敢請韋昭曰言不敢請歸

之神也

三年傳鬱彼從之余足曰鬱氣也彼所也火氣出之

所也裏九年傳云奔火所杜注欠分明

命藏象魏曰舊章不可忘也服虔曰象闕也法令縣

之朝謂其書為象魏案象魏六官所縣之象如治政

教刑之類繪為圖象唐虞所謂畫象是也此說本程

大昌棟案風俗通云光武中興以來五曹詔書題鄉

亭壁歲補正多有闕謬永建中兗州刺史過翔箋撰

卷州改著版上一勞而久逸漢之五曹猶周之六官

又漢時教令皆奏可施行尚書掌之故謂之五曹詔

書亦見應劭傳

拾審注審汁也釋名曰宋魯人皆謂汁為審高誘引

作潘

四年傳諸大夫恐其又遷也承注承音懲蓋楚言正義

曰懲創往年之遷也棟謂承讀為懲經傳無文詩

魯頌曰戎狄是應荆荼是徵則莫我敢承毛傳曰承止也傳言承者謂諸大夫皆欲止之也

五年傳范氏之臣王生惡張柳朔 墨子所染篇云范

吉射染於長柳朔王肱王肱即王孫也古張字省作長見楚相孫叔敖碑此古文也

齊燕姬 服虔曰燕姬齊景公之嫡夫人昭七年燕人所歸

諸子鬻姒之子 服虔曰諸子諸公子鬻姒景公妾淳于人所納案諸子內官傳氏逸據管子辨正杜沿服氏之謔耳淳于人所納未詳所出

諸大夫恐其為子也言於公曰君之齒長矣未有太子

若之何 服虔曰為子為太子也荼少故恐立之言君長未有太子一旦不諱當若之何欲齊侯早立長也案今本為子作為太子疑後人所增杜無注或杜所增也

二三子閒於憂虞則有疾疾亦姑謀樂何憂於無君

服虔曰言二三子當國家閒暇無憂虞恐疾疹在其間今無疹疾何為不自謀樂何憂無君子

寘羣公子於萊 服虔曰寘置萊齊東鄙邑欲使遠齊萊人歌之曰景公死乎不與埋三軍之事乎不與謀師乎師乎何黨之乎 服虔曰萊人見五公子遠遷鄙邑不得與景公葬埋之事及國三軍之謀故愍而歌

師衆也黨所也言公子徒衆何所適也

六年傳楚子使問諸周太史 服虔曰諸侯皆有太史

主周所賜典籍故曰周太史 一曰是時往問周太史

棟案楚靈王言齊衛晉魯皆有分而楚獨無有則楚

不當有周所賜典籍蓋自王子朝奉周之典籍以奔

楚是時當有掌典籍之太史從子朝奔楚楚子在外

而使問周太史也

三代命祀祭不越望 服虔曰謂所受王命祀其國中

山川為望

冀方 高誘淮南子注曰冀九州中謂今四海之內穀

梁傳曰鄭同姓之國也在于冀州詳顧炎武日知錄

闕止 案呂覽以闕止為宰予高誘曰宰予字子我史

記亦言宰我與田常作亂皆秦漢人相傳之語未必

然也

以安孺子如賴 古今人表作晏孺子晏與安古文通

今文尚書欽明文塞晏晏今尚書文思安安司馬彪

曰濟南管縣有賴亭

君大訪於陳子而圖其小 子惠子曰必欲殺孺子而

先以政授陳子此齊之所以也一言喪邦朱毛之

謂

七年傳執玉帛者萬國今其存者無數十焉 戰國策

顏觸曰大禹之時諸侯萬國及湯之時諸侯三千今

乃二十四

邾茅夷鴻以束帛棄韋自請救於吳 告請者無庭實
此云棄韋者賈公彥曰求救非法故有棄韋為庭實
也

社宮 鄭眾曰社宮中有室屋者

乃背晉而奸宋 賈逵曰以小加大

八年傳所託也則隱 所託也者謂所寄託之國則隱

者隱本國之惡也杜注不明

魯雖無與立必有與斃 國於天地必有與立魯無與

立言弱也必有與斃言公賓庚之屬

拘鄆人之漚管者 鄭康成注考工記引作渥管釋文

渥烏豆反與漚同是渥為古文漚也

何故使吾水滋 說文引作茲云黑也釋文云本又作

茲

景伯負載 鄭玄詩箋云載猶戴也謂負戴器物劉光

伯說是也

柝之以棘 說文曰以柴木鑿也从木存聲本又作存

釋文作荐音在薦反非也

遂殺之 悼公弱安能殺鮑子必陳乞之謀也陳乞所

畏者鮑高國耳乞既除高國所畏者鮑氏耳故希公

意并除之而後行篡弒以并齊耳有馬千棄之言亦

乞所搆

十年傳吳子三日哭于軍門之外 服虔曰諸侯相臨之禮

十一年傳黨氏之溝 黨氏魯大夫猶云子駒之門也 注有子冉求也 正誤曰論語冉求稱冉子有若稱有

子冉求字有亦稱冉有二者必有一誤春秋權衡曰 案有子當為子有子有者冉求字也仲尼門人字多 云子某者不得云有子也傳寫誤之矣

見保者而泣 王肅曰保縣邑小城也案晉語尹鐸曰

抑為保障乎韋昭曰小城曰保禮記曰遇人保者

後世

壤地同而有欲於我 呂覽載子胥語曰夫吳之與越

接土鄰境壤交通屬習俗同言語通我得其地能處 之得其民能使之越于我亦然故云有欲於我

得志於齊猶獲石田也無所用之 呂覽載子胥語曰

夫齊之與吳也習俗不同言語不通我得其地不能

處得其民不得使故謂之石田也

烏則擇木 服虔曰烏喻己木以喻所之國

如是則以邱亦足矣 邱賦作於前故云以邱亦足矣

十二年傳吳人藩衛侯之舍注藩籬 案杜注非也藩

藩盾扶胥之屬名為宿衛實用之也

效夷言 觀此則春秋時已重吳音矣不始于晉也

十三年傳為二隧注隧道也 軍法司空治軍隧道義

見淮南子

彌庸見姑蔑之旗 墨子旗識篇曰建旗其署令皆明知之曰某子旗

十四年經齊陳恆執其君寘于舒州 史記齊世家云田常執簡公于徐州司馬貞曰徐字从人說文作郟並音舒續漢志云薛本國六國時曰徐州戰國策齊一篇曰楚成王戰勝于徐州高誘曰徐州或作舒州是時屬齊棟案徐舒古字通易困之九四曰來徐徐子夏傳作茶茶先鄭考工注云茶讀為舒舒徐也茶本古舒字是徐與舒同說文郟讀若塗易釋文云茶音圖然則舒亦有塗音歟非也司馬貞得之

傳諸御鞅 世本曰陳桓子產子亶亶產子獻獻產鞅

司馬貞曰鞅為僕御之官故曰御鞅

子行舍於公宮 服虔曰止于公宮為陳氏作內閒也

成子兄弟四棄如公 服虔曰成子兄弟八人二人共

一棄杜氏云成子之兄弟昭子莊簡子齒宣子夷穆

子安廩邱子意茲芒子盈惠子得凡八人二人共一

棄司馬貞案世本曰東僖子乞產成子常簡子齒宣

子其夷穆子安廩邱子尚鑿意與鑿通茲子芒盈惠子得

凡七人杜預又取昭子莊以充八人之數案世本昭

子將來是桓子之子成子之叔父又不名莊強相証

會言四棄有八人耳今按田完世家田常兄弟四人

如公宮與此事同今此惟稱四乘不言人數知四乘
謂兄弟四人乘車而入非二人共車也然其昆弟三
人不見者蓋時或不在不同入公宮不可強以四乘
為八人添叔父為兄弟之數服杜殊失之正義引世
本云僖子
生昭子莊云云豈亦
因杜注而附會之歟
太史子餘子餘陳氏黨
侍人御之服虔曰閹豎以兵御陳氏
何以見魯衛之士服虔曰子方將欲奔魯衛也
公文氏攻之王符曰衛之公族有公文氏
十五年傳寡君是以寒心高誘戰國策注曰寒心懼
也

二人蒙衣而乘服虔曰蒙衣為婦人之服中蒙其頭
而共乘也
孔氏之老樂寧問之服虔曰家臣稱老問其姓名
遂入適伯姬氏服虔曰入孔氏家適伯姬所居
孔伯姬杖戈而先服虔曰先至孔悝所
遂劫以登台服虔曰於衛台上召衛羣臣
使告季子子路二十字也季子五十字
召獲駕棄車服虔曰駕棄車不駕兵車也言無距父
之意也

行爵食炙王充曰車行酒騎行炙案古人皆以車騎

行酒肉嘯堂集古錄載周叔邦父簠云叔邦父作簠
用征用行用從君王又叔夜鼎云叔夜釁其

饋鼎以征以行用饁用羹
知古人有行爵食炙之事故西都賦云陳輕騎以行
魚騰酒車而斟酌馬融廣成頌云清醪車湊燔炙騎
將行爵食炙而行示無懼也正義以為此句顛倒辭
氣不允蓋未通於古

奉衛侯輒來奔 服虔曰召獲奉衛侯

弗及不踐其難 賈逵曰言家臣憂不及國不得踐履

其難鄭衆曰是時輒已出不及事不當踐其難子羔

言不及以為季路欲死難也

無入為也 服虔曰言輒已出無為復入

必或繼之 王肅曰必有繼續其後攻太子

十六年傳旻天不淑不慙遺一老俾屏余一人以在位

應邵曰慙且詞也言旻天不善於魯不且遺一老

使羣蔽我一人也鄭玄所引與此同今不淑作不弔

慙作慙王肅曰屏輔也

煢煢余在疚 鄭康成許叔重引此傳皆作嬛嬛

嗚呼哀哉尼父 鄭玄曰尼父因日字以為之謚孔氏

駁之案字謚見穀梁非康成臆說以字為謚左傳有

明文孔氏之駁未為得也

使貳車反柝於西圃 魯語曰天子有虎賁習武訓也

諸侯有旅賁禦災害也大夫有貳車備承事也士有

陪乘告奔走也許叔重五經異義曰或曰卿大夫有

主不答曰卿大夫非有上之君不得祫享昭穆故無

主古春秋左氏傳曰衛孔悝反禘於西圃禘石主也
言大夫以石為主謹案大夫以石為主禮無明文大
夫士無昭穆不得有主今山陽民俗有石主玄之間
也以下鄭氏駁少牢饋食大夫祭禮也束帛依神特牲饋
食士祭禮也結茅為叢主者神象也孝子既葬心無
所依以虞而立主以事之唯天子諸侯有主卿大夫
無主尊卑之差也卿大夫無主者依神以几筵故少
牢之祭但有尸無主三王之代小祥以前主用桑者
始死尚質故不相變既練易之遂藏於廟以為祭主
孔悝禘主者祭其所出之君為之主耳以上皆鄭氏說鄭志張逸問許氏異義駁衛孔悝之反禘有主者何謂也答云禮大夫無主而孔獨有者或時未代之君賜之使祀

其所出之君者諸侯不祀天而魯郊諸侯不祀天子而鄭祖厲王皆時君之賜也正義曰以
為孔氏姑姓仕於衛已歷多世不知本出何國安得
有所出公之主知是借為之此說非也管子山至篇
曰君人之主弟兄三世則昭穆同祖十世則為禘三
世則同祀所出之公故不立主十世為禘所以別于
宗也案世本莊叔遠至孔悝凡七世上歷三世當在
春秋之前至孔叔時合為禘主春秋以來兼國多矣
未必皆書于經何得以所出之公無考而遂謂之借
耶鄭氏之言不為無本若以舊章放失追議先儒恐
違闕疑之義昭十九年傳云懼隊宗主服虔云禘主藏于宗廟故曰宗主

市南有熊空僚 高誘曰熊空僚勇士居楚市南

請以戰備獻 子惠子曰戰備猶家備備甲兵也

齊管脩 風俗通曰管脩自齊適楚為陰大夫

高府 淮南子曰闔閭伐楚五戰入郢燒高府之粟蓋

宮中府名

圍公陽 史記曰惠王從者屈固

其徒微之 說文曰微隱行也

十七年傳戎州 司馬貞曰陳留濟陽縣東南有戎城

濟陽與衛相近故莊公登台望見戎州又隱七年云

戎伐凡伯于楚邱是戎近衛

鄭般 說文曰鄭宋地也讀若讒疑般采邑

十八年傳宋殺皇瑗 汲郡古文曰敬王四十三年宋

殺其大夫皇瑗于丹水之上丹水雍不流

廿年傳吳公子慶忌 高誘曰慶忌吳王僚之子又淮

南子注云吳王僚之弟子

史黯 高誘曰史黯史墨也

廿一年傳使我高蹈 呂覽曰子胥高蹶高誘曰蹶蹈

也傳曰魯人之高使我高蹈 高峽皋通見釋名

廿二年傳甬東 賈逵曰甬東越東鄙甬江東也

廿三年傳其可以稱旌繁乎 繁說文引作緜云馬髦

飾也

廿五年傳褚師聲子鞮而登席注古者見君解鞮 東

昌彭氏軌以為古無見君解鞮之禮棟案燕禮云賓

反入及卿大夫皆說屨升就席鄭志云凡燕坐必說
屨屨不在堂也蕭山毛氏牲以為脫屨非解鞮也棟
又案少儀云凡祭於室中堂上無跣燕則有之鄭志
云祭不跣者主敬也燕則有跣為歡也毛牲曰燕飲
君但脫屨而臣必解鞮記曰燕則有跣跣者解鞮也
閻百詩曰陳氏禮書謂漢魏以後朝祭皆跣鞮又
謂梁天監問尚書奏議案禮跣鞮事由燕坐今極恭
之所莫不皆跣清廟崇嚴既絕常禮凡有履行者應
皆跣鞮蓋是時有不跣鞮者故議者及之杜氏謂見
君解鞮見君字不確須易為古者燕飲解鞮耳 棟
又案宣二年左傳云晉侯飲趙盾酒其右提彌明趨

登曰臣侍君宴過~~庭~~爵非禮也遂扶而下服虔本作
遂跣以下注云趙盾徒跣而下走此本書燕飲解鞮
之明文也左傳古本畫為杜預所改故學者每有疑
義莫能詳焉

君將設之 說文引作設云歐兗从口設聲玉篇同案
釋文作磬與說文合與石經異釋文是也
君何所不逞欲 說文引云何所不逞云楚人謂疾行
為逞

廿六年傳后庸 唐石經作舌庸廿七年傳同 吳語亦
掘褚師定子之墓 掘玉篇引作搨云掘也釋文云本
或作搨 戰國策禽滑厘古
今人表作禽屈厘

左傳言六

公遊于空澤 酈元曰獲水東南逕空桐澤北澤在虞城東南左傳公遊于空澤卽此然則空澤者空桐之澤也

今君無疾而死 汲冢古文瑣語曰初刑史子臣謂宋景公曰從今以往五祀日臣死後五年五月丁亥吳亡後五祀八月辛巳君薨刑史子臣至死日朝見景公夕而死後吳亡景公懼思刑史子臣之言將死日乃逃於瓜圃遂死焉求得已盡矣

使祝為載書 周禮詛祝作盟詛之載辭 廿七年傳設棄車兩馬 服虔曰一曰兩飾 及留舒 鄭康成引在柳舒孔氏曰留柳不同蓋所據

書異棟案裴松三國志注云古劉留聊柳同用卯字以从聲故也
律歷志云留執於卯
吾乃今知所以也 子惠子曰恨其語不審

惠定宇先生左傳補註六卷向在京師假閱未及錄乾隆壬辰冬歷城周書昌寄副至羊城乃戴東原先生手校本予覆按其半將歸潮陽以付順德胡生亦常刻之明年癸巳三月胡生書至云刻未竣而病久之始知其是月已死其冬予再至羊城屬順德張君錦芳藏其事而胡生不及見矣胡能詩古文精六書予辛卯分校鄉試所得士會試報罷與東原同舟行月餘慕其學歸益鑽研經義豁


左傳注六

三

然有心得而天弗假以年惜哉甲午二月益都李
文藻記

左傳補註卷第六

順德張錦芳覆校



天除中平

